



अमर्यतु वर्शुन

(लीलायि सोम्बरन)



टी.एन.गंजू 'विश्वास'
आकूरा, अनंत नाग, कश्मीर,
हाल मुठ्ठी लोवर, गणेश विहार, जम्मू।

अर्पण



04 अगस्त 1962 ई. प्यठु 31
जनवरी 1973 ई. ताम

तस यावन मच्चि येमि म्योन पोशि
बाग फोलराँविथ थोव तु पानु
द्रायि वन विगिन्यन सुत्य रँव्य
करान करान तु खँच स्वर्गस

-विश्वास

▼ सॉरी होकूक म्यान्यन स्वपुत्रन 'सुनील' तु 'राजेश'
सुंदि नावु रॅछिथ ▼

नाव	:	अमर्यतु वर्शुन
शॉयिर	:	टी.एन.गंजू
कलमी नाव	:	'विश्वास'
श्वद नागरी कॉशरिस		
मंज़ फिरन वोल	:	पृथ्वी नाथ कौल सायिल
कमप्यटर मॉहिर	:	IILS D.T. P CENTRE
		रिंकू कौल # 9419136369
कुल सफु	:	118
छापन सनु	:	2008 ई.
कुल तेदाद	:	पांछ हथ किताबु
म्वल	:	अख हथ रवपयि सिर्फ
पब्लिशर	:	

किताब कति कति मेलि:

1. टी.एन.गंजू 'विश्वास', मकान नं.111,
गणेशविहार, लोईवर, मुठ्ठी, जोम।
2. केवल शर्मा, पंडित स्टोर,
गणेशविहार, लोईवर, मुठ्ठी, जोम।
3. सुनील गंजू, 4082-ए, कसटमर्स कालोनी,
सेक्टर 37-C, चण्डी गढ़।

1. The first
2. The second
3. The third
4. The fourth

5. The fifth

6. The sixth
7. The seventh
8. The eighth
9. The ninth
10. The tenth

यथ सोम्बरनि मंज

	ॐ वशवास येलि आसि - पृथ्वी नाथ कौल 'सायिल'	1
	ॐ व्यनती छठम - टी.एन.गंजू 'विश्वास'	10
1.	ग्वर येम्य प्रजनोव, प्रजनोव पान	13
2.	तस महा गणेशस जय जयकार	14
3.	जाय छय थजरस तस जानानस	16
4.	ज्ञानच कथ छय दारुन ध्यान	17
5.	ओंकार स्वरूपस परमेश्वरसुय	19
6.	ओमुय जफतो ओमुय स्वरतो	20
7.	श्री हरी हरसुंजय गॅन्यराव माय	21
8.	श्री हरी सुंज माय यस गनि मने	23
9.	ओमुसुय पुशिराव पांछ त्वत पान	24
10.	कोर जंगलव द्राख	25
11.	वीदनय ज्ञानख सारस सनतो	27
12.	मनु वनतो सनुवुन चुय	29
13.	सोरुय मॅशरुन त्रावुन	31
14.	दारु होर म्वकलिथ गरु छुय त्रावुन	33
15.	टुकि पॅक्क पॅक्क छुय पान थॅकरावुन	35
16.	क्षण क्षण ध्यान दारबस ओंकारस	36
17.	बु छद्धारन कती बालु बालय यार	38
18.	पानस रॅटथ पॅक्कीरी	40
19.	अख हवस ओसुय त्रे सीरी	41
20.	ॐ शम हमसो सो सोहम	43
21.	पम्पोशि पादन डंडुवत प्रणाम	45
22.	पादन लगुयो हाव दर्शुन	47
23.	बॅव्यनय जय नुन्दुबाने	49
24.	शिव नाथु यि सॉसोन म्यॉन्य छय द्रुय	50
25.	दादन वातुम वादु मय मॅशराव	51
26.	मे छे चॉनी सथ रुच हावुम वथ	52
27.	मे ओनमय ऑलु बेयि नाबद त्रे डॉली	54
28.	नन्दु कीश्वर नाव शूबिदार चोनुय	56
29.	वनु वनु पय चोन ब्रारि आंगॉनी	57
30.	शिव सुंजि मायि पख येमि कायाये	60
31.	योर आख तोरु ह्यथ कर्मुक बारय	61

32.	लोलस चॉनिस लोल बरय	63
33.	ब्रम ज्ञान सम्सार वक मु कर जाये	64
34.	शारिकॉय नावस लगय पॉर्य पॉरी	66
35.	संतोष अमर्यथ संतोष सु पानय	67
36.	वाख	69
37.	मे ओनमख लोलु सालय	71
38.	मस चमु लोलय लोलुकिस खज्ञानस	72
39.	म्वरली दर म्योन छुख चु भगवान	73
40.	आव हय गोविन्द जन्मस सोन	75
41.	वाख	76
42.	ओम शब्द मिजराब छुम	78
43.	पोशि मालु लोलो	79
44.	सु छु पानस सुंतिन मेय	81
45.	वानय वानय मतु नचुतो	82
46.	श्रु गणेशस कुन	84
47.	जगत जनुनी माता शक्ती कुन	85
48.	परमु शिवस कुन	86
49.	जोरु जोरु परयाँय दुर्गाजी	88
50.	बु हसॉ ललुनावन मन्जलिस मंज	89
51.	जानि जानानय हावि दर्शुन	90
52.	मोल म्योनय यूगीश्वर	92
53.	कण्णु दर्शुन हय करव (खँय तर्ज)	94
54.	पनुने रंगु मेति रंगनावतम	95
55.	बब हय आव बबु भगवान आव	97
56.	थोवुम गुप बब हृदयस मंज	98
57.	साक्यन चोवनस मॉर्यफतु मय	100
58.	सहायतस रोजुम भवॉनेय दमबदम	101
59.	मोदुर मय	103
60.	महरेरि कोरि ऑही	104
61.	जय जय कार	106
62.	व्वलुरुक्य म्वनि पॅल्य	107
63.	मंगला नाव चोन कर मंगल	108
64.	सोरुय तॅम्य सुंदुय	109
65.	श्रधांजलि	111

ग्वडुत

विश्वास येलि आसि

विश्वास छु इन्सॉन्य जिंदगी हुंदिस कदमस कदमस प्यठ पनुन आसुन न आसुन बासुनावान तु ज़ॉहिर करान। यि छु सु अहेसास युस इन्सानस इन्सॉन्ययेंच हुंद सबक तु ओसूल परस्ती हुंद पाठ पलि पावान छु। शन हर्फन हुंद यि लफ़ज़ छु वनुन क्युत बडु लोत मगर तोलोन तु अम्युक ग्वब्यर तु अम्युक वज़न छु कॉफी। योत तॉन्य अमिकि मानि मतलबुकि खजरुक, वूसी आसनुक तु अम्युक तोलुक छु, यि छु स्यठाह खोल तु कुशादु, बाडवु किन्य ति छु जान तु कदावार। अम्युक काड छु कपॉर्य कपॉर्य द्रामुत। खाह सु पूर्ण त्याग या सम्पूर्ण समर्पण नीतोन या पनुन सोरुय कैह तस परम ब्रह्म परमेश्वरस वैंदिथ द्युन या तँस्य पुशरावुन ऑस्यतन। यस पोज़ विश्वास आसि, यँकीन मँहकम आसि तसुजिं येछि पछि छु मनु कोंछमुत फल ज़रूर तु ज़रूर बदस यिवान। सु छु स्यठाह प्रसन्न सपदान तु तस छे नु यि देंप्यजिं ति पछुय यिवान। तस छि ब्वकु फ्वलान तु फैक्यव पैठ्य माज़ खसान। यिहय कीफियत सपुज म्यॉनिस 'विश्वास' सॉबस ति तमि सातु येलि भगवान गोपी नाथ जी सुंदिस आश्रमस मंज़ 1997 ई. किस सपुद्यमुतिस ग्वरु वंदना कवि सम्मेलनस मंज़। येलि अँमिस कलमी नाव तख्खलुस लेखनुक इसरार सपुद। अदु तनु छु म्योन त्रियलूकी नाथ गंजू 'विश्वास' लेखान। ओरु योरु छँन्ड छॉडं दिनु पतु नन्यव जि विश्वासस छे यि गुंगराय मॉल्य वरासतस मंज़ुय हॉसिल सपुज़मुच। विश्वास छु यड बैरिथ ल्यूखमुत तु लेखनस

छुनु कुनि रंगु पोत ह्यवान तु न छु पॅत्य यिवान ।

अॅम्य संज्ञन रचनायन मंज छु बाव बुबरायि हुंद बास सपदान ।
येम्य यि आज़ाद नज़मु ति लेखु नोव तु बाकुय सिन्फन हुंज तबा
आज़मॉयी छु बदस्तूर जॉरी थॅविथ ।

य़ोत तान्य अॅहंजिं गरकुली जिंदगी हुंद तोलुक छु, 'विश्वास'
जियुन पिता जी ओस ओकुर गंजू, मटन, अनन्तनागुक स्वर्गी दयाराम
गंजू । विश्वास येलि पॅरिथ लीखिथ म्वकल्योव तु बनेयस तहसीलस,
ज़िलस मंज सरकॉर्य नोकरी । पतु कोरहस खांदर तु ज़ायस शुर्यहन
तारु वुनि ऑसिस अलुपलु दॅह साढ़दॅह वॅरीयी गॉमुत्य तु गर वाजनि
द्युत अमानथ, युस बे मोकु तु बेयि स्यठाह दिलदोज़ वाकु ओस ।
विश्वास गव ज़नतु दम फुट्य । अडखूर्य शुर्य पेयस प्यतरुन्य तु पालुन्य ।
तिमन मोल लागुन ओस हकुय, दफ तिमन पेयस मॉज ति लागुन्य ।
वुनि ओस वाँसि ल्वकुट । होवर्यव क्यो गरिक्यव कर्योस ब्याख
खांदर करनुक इसरार, अमा पोज़ विश्वासन कोरनु तम्युक रछ ति
ख्याल । तॅम्य रॅछ यिम शुरय तु रूद दयस प्यठ यछ तु पछ थॅविथ
कामयाब ज़िंदगी जुवान । शुरय कॅरिन बजाह, नेत्रु पॉतरु ति कॅडिन ।

यनु कॅशीर मंज आतंक वाद फॅहल्योव तु न लगन वॉल्य
शॉन्ती हुंद पॉरव, कौशिर्य चॅल्य वाँसन हुंज ज्यनु जाय, मिलकियत
तु वरासत तॅती त्रॉविथ यजतुचि रॉछ किन्य तु जुव लर्ज़ किन्य ।
अथ ज़दस मंज यिथ आव विश्वास ति चॅलिथ जोम तु वुन्यक्यन छु
जेमी रोज़ान । अख सरकॉरी रिटार्याड मुलॉज़िम नायिभ तॅहसीलदार ।

रूज़ व्वन्य अॅहंज शॉयिरी तु अदब । विश्वासस छु वोतमुत
यिमय वॅरी त्रुहुमरु शार वनान । गज़ल, नज़म, आज़ाद नज़्म तु

व्यनेच, आराधनायि तु लीलायि वनान । अदबी ज़ोक् शोकस सुत्य
 सुत्य छे अँमिस मंज़ दयि स्मरणि तु सनातन धर्मच असुल प्रवथ
 मूजुद । यिम संस्कार छि अँमिस पनुनिसुय पिता जियस तु बुर्जगन
 हुंदिस स्वहबतस मंज़ हॉसिल सपुद्यमुत्य । योदवय यिमन यूतकाल
 शार वनान वोत मगर गरुकिस लोह लंगरस मंज़ स्यठाह आवुर
 रोज़नु किन्य रूद यि पनुनि रचनायि बाजर कडनस मंज़ पथ । अज़
 छु ग्वडनिचि लटि यि पनुन्यन व्यनेचन हुंज यि इन्तिखॉबी सौम्बरन
 किताबी सूरँच मंज़ ह्यथ बाज़र द्रामुत । सौम्बरनि छु नाव 'अमर्यतु
 वर्शुन' । पांचुहॉठन रचनायन हुंज़ यि सौम्बरन वुछिथ छु ननान ज़ि
 विश्वास छु धार्मिक ग्रंथन हुंद और मुतालु थावान । तु पज़ि मनु छु
 पनुन्यन दीवीयन तु दीवताहन क्यो संतन सादन हुंद ग्वण व्यछुनावान ।

अँमिस छु रयवॉयती आयि लेखनस मंज़ स्यठाह मज़ु तु
 साद बासान । यिमन छु पनुन अख मखसूस आय तु आहंग । सनुवुन्य
 यिहंद्र मॉर्य मँद्य भजन छि दिलस प्रेयिवुन्य, तु धर्मच प्रवथ बखशन
 वॉल्य । योत ताम अँलिमि ओरुज़ुच खबर आसनुक तोलुक छु ।
 विश्वासस छे वारयाह पताह तु वारयाह छुस हेछुन । वक्तु वक्तु छि
 यिमव मुशॉयिरन मंज़ ति शरकत कॅरमच । रेडियो कशमीरु प्यठु ति
 छख वारयाह रचनायि बोज़ुनाविमुचु । मे छे पूरि पूर आश ज़ि विश्वास
 प्रावि जल्दुय अदबी हलकन मंज़ अख श्वहरँच बोरूत नाव । विश्वास
 छु हिन्दोस्तॉनियस तु कॉशरिस मंज़ लेखान । यिमव छु वारयाह
 ल्यूखमुत । दौयिम किताब छाप करनावनुक संज़ ति छि यिम वुनि
 कि प्यठय करान ।

यिहुंज यि शारु सौम्बरन गछि कॉशरि ज़बॉन्य हुंदिस शॉयिरी

अदबस मंज अख बागि बोरुत बॅरचर सॉबित । किताब अमर्यतु
वर्शुन परनु सुत्य गछि त्वहि मंज ति दयि विश्वास व्वपदिथ तु विश्वासुन्य
मेहनत ति अनि रंग । बु करस ऑही जि यॅहय शोज़ तु श्रूच बॅखती
अॅन्यनस रुत अंजाम । जिन्दु रूजिन तु रूमुरेशुन आय लॅग्यनस ।

विश्वास गॅन्यनस, विश्वास सॅन्य नस,
विश्वास बॅरयनस ध्यानु ध्यारणा ।
विश्वास पूर्ण कल्याण कॅरयनस,
विश्वास दीनस श्वद प्रेरणा ॥०॥

कॅह शार करु म्बु तुहुंद मॉल फिरनावनु खॉतरु ; येत्यथ दर्जः
ग्वरु दीवस कुन छि वनानः

ग्वर येम्य प्रज़नोव प्रज़नोव पान,
परमु ग्वरु दीव गोपी नाथ भगवान ।

महागणेशस कुन छि यिथु पॉठ्य वनानः

ज़पु येगनि तपु यस ग्वडु अनुवॉर्य,
बॅखत्यन वालान पापुन्य बॉर्य ।
दीनु दुखियन हुंद सुय टोठ यार,
तस महागणेशस जय जय कार ॥

अॅकिस रचनायि मंज छि यिथु कॅन्य बावानः

रुच क्रय ख्यन दिस अमर्यथ चावी,
हावी पनुनुय जहूर ।
छिनु बकार धनु द्वार तस धनुवानस,
सुय छुय पानस अंदर ॥

ओंकार स्वरूपस मुतलिक यि शार वुछिवः

ओमुय साकार न्यराकार ॐ,
 ओमुय सूहम, सूहम ॐ ।
 ओमुय ततसत ओमस कर जय,
 ओमुय सुतिन थॉविथ लय ।।

या

ग्वड बर बॅखती लोल तय माय,
 शेरुस जाय शेरस प्यठ ।
 ज्ञानु ध्यानु धारणायि प्रज़लावान,
 ओमुय ज्ञान मनस मंज़ ।।

दीतव यथ शारस दादः

परमु शक्ती बॅखतियि कर हॉसिल,
 ज्ञानु ध्यानु सुती बनख वॉसिल ।
 लामकानस लय गछ्ख पूर लोलो,
 मनि छारुन यार छुन दूरि लोलो ।।

यथ शारस मंज़ वुछिव कोताह सन्यर छु बावनु आमुतः

रंगु रंगु रूपन ध्यान छुय थावुन,
 क्याह खबर कमि रूप हावि दर्शुन ।
 सति रंगु रंगुविथ पान छुय थावुन,
 अदु छुय छावुन पोज़ गुलज़ार ।।

कर्म छि यिथु पॉठ्य व्यछनावानः

कर्मचि नावे काँसि कॅह नु रावे,
 तोलनस क्षणु पानय सुय ।
 तस डँडी दारस पान पुशिरावुन,
 वति बनि अथवास ल्वति ल्वति पख ।।

शिव शंकरस छु यिथु पौठ्य बॅखती पोश लागान ।

कनन छिस वॉल्य चंदनुक्य नॉल्य,

छु फेरान आसुवुन बॉल्य बॉल्य ।

वसान जैटि मंज छस गंगु दार,

दियम दीदार मनस अंदर ।।

भगवानु सुंद बजर किथु कॅन्य छु यथ शारस मंज वखनावानः

पानस रॅटिथ फकीरी,

बॅखत्यन दिवान अॅमीरी ।

अॅम्य संज यि दस्तगीरी,

छय बे मिसाल वैस्ययाँय ।।

स्वक्रेयि हुंद ह्यस छि यिथु कॅन्य वुजनावान तु व्वटि अनान स्वकर्म
करनु बापथः

रजि रजि खॅस्यथुय प्राव मँजिल,

ग्वडु कर यिकुवटु प्रान तय दिल ।

छाव थाव बानस वारु दितु दम,

संसार ज्ञानतो बॉज्यगार ब्रम ।।

माजि रॉगिन्यायि छि यिथु पौठ्य ज़ॉरी करानः

डंडुवत प्रणाम छुस पम्पोशि पादन,

शीश म्योन माजि रॉग्यन्यायि अर्पन ।

व्यापक छे हनि हनि मॉज भवॉन्य पानय,

दॅहन दिशायन च्वन तर्फन ।।

यथ शारस मंज वुछिव किथु कॅन्य छि आशि तोशस जुव तु जान
वंदानः

पादन लगुयो, हाव दर्शुन, छम मे चॉन्य लादन,
हा आशि तोशे, जान वंदुयो कन थव मे नादन ।
आश छम चॉनी सीरु बाजो मो डल चु वादन,
हा आशि तोशो जान वंदुयो कन थव मे नादन ।।

शीश नागस छि यिथु कॅन्य त्वता करानः

जलसुय मंज छु चोन आसन,
नीलु नागु सनम्बख चु बासन ।
भय गछान दूर नावु चाने,
सासु म्बखु शीश नागु म्याने ।।

ब्रारि आंगनचि उमा दीवी हुंजि बॅखती रचुनायि मंज छि यि बावथ
करानः

वनचन विगिन्यन चॉनी छय माय,
स्वंदर वनस मंज चॉनी जाय ।
स्वखु दायक छख द्वख चु हरॉनी,
चे शरण छी उमा भवॉनी यॉय ।।

‘लोलस चॉनिस लोल बरय’ रचुनायि मंज छि शिव बॅक्ती येमि
आयि करानः

गायत्रेय चे छय नॉल्य नागराज,
बॅखत्यन दिवान मुक्ती चु दाज ।
हर जायि चु व्यापक हॅरी हरय,
पूज हो करय, पूजा करय ।।

या

ब्याख शार बेयि रचुनायि मंजुः

मनुकिस सँदरस मो मार ग्राये,
 शमु दमु ज़ाग ह्यथ रोजुस तल ।
 वॉरागु वॉति वस सनिरुचि जाये,
 माये लारुस छारुन यार ॥

संतोष अमरयथ नावुचि रचुनायि हुंद यि शार वुछिव कोताह रँस्युल
 छु:

ॐ भू भवः स्वः मंत्र रुत क्याह,
 परि युस प्रेयमसान बनि निंवान ।
 कुन ओस कुन छुतु कुन रोज़ि पानय,
 तस शिव वनानय करूस पूजाह ॥

यि वाख ति छु दाद दिनस लायक:

सुय बनि हम सू, बनि सुय सूहम,
 ज़िंदु मरि रिंदु नेरि जान ।
 सुय लबि पय अदु तस जानानस,
 यस आलुमन मंज़ परमस्थान ॥

‘बोल बोश करु जानानस सुत्य’ रचुनायि मंज़ु यि शार:

मस चमु लोलय लोलु मसवानस,
 बोल बोश करु जानानस सुत्य ।
 मनुके नागरादु वुज़ि वुज़िन्य मै पानस,
 बोल बोश करु जानानस सुत्य ॥

या

अंतस युस ज़पि पनुनिस ओमस,
 सुय गव यूगी शक्ती भाव ।

यी कैह ल्यूखुम ती हा मे वोनूम,
खँनिथ जिगरस तसुंद नाव ।।

पानो पखतो बबु सुंदि ज्ञानय,
वानय वानय मतु नचतो ।
छुय मा प्योमुत कांह अबख छानय,
वानय वानय मतु नचतो ।।

यिथय यिथय पॉठय छि शुमारु बॅद्य शार यिम तोह्य पानय किताबि
मंज पॅरिव । अमरयतु वर्शुन छु आमुत मुस्सनिफु सुंजि अर्धीगिनी
अर्पन करनु । बस दिमु व्वन्य हवालु मूजूब श्रद्धांजलि रचनायि मंजु
सिर्फ अख बंद त्रैयव बंदव मंजु तु बस:

आरु रोस द्राव यार म्योन,
त्रॉविथ मे चोल वनुवास गव ।
दिल पनुन कति रूद पनुन,
ह्यस होश डोलुम तलवास गव ।।

ॐ शान्ति ॐ

पृथ्वीनाथ कौल 'सायिल'

138 शारिका विहार, सेक्टर 4, लेन 4

लोवर रूपनगर एनक्लेव,

(मुठ्ठी), जम्मू 180013

व्यन्ती छम

कॉन्सि लिखॉरिस या शॉयिरस गछि नु यि गुमानु गछुन जि सु क्याह छु शार वनन वोल् । पोज़ छु यी जि यि केंछाह ति लेखनु छु यिवान ति छम पिता परंब्रह्म संजुय यछा सात्त्विक वृद्धी मंज माता सरस्वती जी मनस मंज अँचिथ मनुकि नागरादु वुजान तु शॉयिर सुंद कलम छु शमाह बावथ करनु खॉतरु दयि कृपायि किन्य लीखिथ ह्यकान । पँज शॉयरी गँयि स्वय यथ मंज दयि सुंद बजर तु प्रकृती हुंज बँखती, ज्ञान, तु ध्यानुक्य च़ाँग्य ज़ालनु आमृत्य तु अंधकारस दूर कँरिथ पूर्ण प्रकाश भास्कर आसि प्रज़लान । बाकुय शार बेतरि छि अलगुय कांह हकीकत य्वसु ज़न शॉयर सुंदि दँस्य छे ह्यकान वर्णन सपदिथ । पोज़ तथ ति गछि माजि सरस्वती हुंदुय अनुग्रेह आसुन ।

विश्व कल्यानुच भावना तु कल्पना ह्यथ छुस बु त्रिलोकी नाथ गंजू 'विश्वास' पोत्र स्वर्गीय पंडित दया राम गंजू असली बाशन्दु ओकुर मटन तहसील तु ज़िलु अनन्तनाग कश्मीर तु वुन्यक्यन विश्वास वाटिका, मकान नं 111, गणेश विहार, लोवर मुठ्ठी, (धरमाल) जैमि रोज़ान तु यि बावथ करान जि परम पिता परम शिव सुंदि दितिमति कलमु, माता सरस्वती जी तु भगवान गोपी नाथ बबु संजि कृपायि किन्य छि मे कॉशरि तु उर्दू ज़बॉन्य मंज विज़ि विज़ि वेलु वक्तस मंज रच़नायि गरिमच़, यिहुंद तेदाद हतन मंज छु तु बेयि छि यि अज़मॉयिश जॉरी । यिम ज़न बँखती, ज्ञान तु ध्यानुक द्वाद ज़ोवरॉविथ तु मॉन्दिथ थँन्य बनान छि लीख्यमृत्य ।

यि कथ बावन्य छे ज़रूरी जि शॉयरी हुंद कलम संबालनु

पतय लोग मे पनुन कलमी नाव छारुन तु लेछाम 'बुलबुल' । पोञ्ज यि रूद तोत ताम योत ताम असि माजि कॅशीरि रेश्य वारि मंजु जुव लर्जु चलुन प्यव । तमि पतु ल्यूखुम जोम वॉतिथ 'शांत' । पोञ्ज यि रूद कमसुय कालस वरतावनु यिवान । ऑखरस आव 1997 ई. मंज (येलि भगवान गोपी नाथ बबुनिहँतिमि जन्म द्यनचि पूर वॅरययिचि तकरीबु मनावनुकिस सिलसिलस मंज ओदय वाला भगवान गोपीनाथ जी सुंदिस आश्रमस मंज अमिकि ट्रस्टुकि एहतिमामु अकि ग्वरु वंदना नावकि कवि सम्मेलनुक संज करनु ।) अदु मॅ ति पॅर पनुन्य ग्वरु वंदना । कवि सम्मेलनुक्य अॅक्य म्वहतमिम आदरनीय पृथ्वी नाथ कौल 'सायिल' सॉबन वोन मे हमदर्दी सान जि जान गछिहे 'शांत' कलमी नाव बदलावुन, तिव्याजि 'शांत' छु प्रो. रत्न लाल ति लेखान । तु तिम छि वारयाह मशहूर तु अदबी हलकन मंज छु यि अख खास नाव । मे पुछ सॉयिल सॉबस तेलि क्याह लेखु बु तु, सॉयिल सॉबस चोल वछि वॉलिंजि नीरिथ 'विश्वास' । बब छुम सॉक्षी मे ज़ोन यि भगवान बबु सुंद लोलु होत प्रसाद तु दिन्नमस थफ तु पतु वरतोवुम विश्वासुय योत ।

पनुन्यव वारयाहव तखलीकव मंजु छुस बु अज पनुन्यन दोस्तन हुंदिस बांद बांद करनस प्यठ रचुनायि पांचुहॉठु मरु अॅकिस सोम्बरनि मंज बाज़र कडनुच जसारथ करान । पडेहेम लोल बरेहम । यथ ग्वडुनिचि शारु सोम्बरनि हुंद नाव वोथ अमर्यतु वरुण ।

म्यानि येमि ग्वडुनिची शारु सोम्बरनि हुंदि छाप करनुक श्रेय छु म्याॅनिस परमु ग्वरुदीव भगवान गोपीनाथ बबस ग्वडु तु तिहुंजि यछायि छु म्याॅनिस पनुनिस परम मित्र आदरनीय पृथ्वी नाथ कौल

सायिल सॉबस यिमव मे यि किताब छाप करनस मंज अम्युक रसमि
 खत श्वद कॅरिथ तु अमिच शेरु पॉर कॅरिथ तु अथ किताबी सूरत
 दिथ स्यठाह स्यठाह हमददी कॅर । 'सायिल' सॉब छि पॅज्य पॉठय
 बहलि पायि तखलीक कार, सहाफी तु कॉशरि ज़बॉन्य हुंघ थ्यकुन्य
 लायक चुक्य दर । मे वुछ युहुंद खलूस प्रोखुट । यिम छि कॉशरि
 ज़बॉन्य तु कॉशरि अदबुक्य स्व प्रज़लवुन्य मशॉल्य खसु हर हमेशि
 ज़ोतुवुन्य रोजुन्य गछि । यिथिस चुक्यदरस प्यठ आसि सारिनय
 फख्र । भगवान बब रूज़िन यिमन तु असि सारिनय सदा मेहरबान ।

ॐ शम ।

त्रिलोकी नाथ गंजू 'विश्वास'

तस महा गणेशस जय जयकार

शिवनाथन यस द्युत आदि दीव आधिकार,

तस महा गणेशस छु जय जयकार ।

बैखत्यन बोझान सुय सदा जार पार ॥

तस महा गणेशस छु जय जयकार ॥० ॥

पादि कमलन ग्वडु तस प्यमु परनुय,

सुत्य रट चरणुय ग्वरु दीवस ।

यिहंजि नामु स्मरनि लबु भवसु तार ॥

तस महा गणेशस छु जय जयकार ॥० ॥

शक्ती हुंदुय युस जन संतान,

साधन संतन हुंद सुय ध्यान ।

ऋद्धि सेद्धि हुंद युस पानु ताजदार ॥

तस महा गणेशस छु जय जयकार ॥० ॥

जपु यॅगनि तपु यस ग्वडु अनुवॉर्य,

बैक्तयन वालान पापुन्य बॉर्य ।

दीनु दुखियन हुंद सुय टोठ यार ॥

तस महा गणेशस छु जय जयकार ॥० ॥

कैह वनान छिस एक दन्त,

कैह वनान छिस व्यनायक ।

सुय म्योन आदि दीव मूषकस सवार ॥

तस महा गणेशस छु जय जयकार ॥० ॥

टॉठ्य छिम लॅड्य अॅमिस ख्यावन बावु सान,
चावन द्वद ख्यावन खिरु थाल ।

यवहय म्योन गणपत छु सर्व आधार ॥

तस महा गणेशस छु जय जयकार ॥० ॥

‘विश्वास’ दासु बावु म्योन ज़ारु पार,

गौरी शंकरस सुत्य ह्यथ कुमार ।

सहायतस रोजुम शिव ह्यथ परिवार ॥

तस महा गणेशस छु जय जयकार ॥० ॥

नमो भगवते गोपी नाथाय ग्वर येम्य प्रज़नोव

ग्वर येम्य प्रज़नोव, प्रज़नोव पान,

परमु ग्वर दीव गोपीनाथ भगवान ।

क्षण क्षण छुस म्योन डंडवत प्रणाम ॥

परमु ग्वरु दीव गोपीनाथ भगवान ॥० ॥

सेदि दाता छुम सुय महा गणेश,

रॉगिन्या, शारिका, शारदा पीठ ।

तनु मनु तस रोज़ु पूजाह करान ॥

परमु ग्वरु दीव गोपीनाथ भगवान ॥० ॥

परम ब्रह्म, शंकर, ब्रह्मा, विष्णु,

त्रिकूटी दीवता, म्योन सुय छुम ।

शक्ती स्वरूप तय बॅखती प्रदान ॥

परमु ग्वरु दीव गोपीनाथ भगवान ॥० ॥

ताज छुस दस्तार मलमलि हुंद,
 ट्योक छुस चॅन्द्रम क्वंगु वारि हुंद।
 नागु राज हटि नौर्यवन शूबान॥
 परमु ग्वरु दीव गोपीनाथ भगवान॥०॥

चरसु दुह क्याह छकान म्वखु सुय चिल्म,
 ब्रौह कनि ज्वालाजी दून्य दज़ु वुन्य।
 तपु ज़पु ज्ञानु ध्यानु ज्यूत्य प्रज़लान॥
 परमु ग्वरु दीव गोपीनाथ भगवान॥०॥

पम्पोशि पादन छस रवनि ख्राव,
 सारिनय बासान सोनुय चाव।
 राधायि छुनु कृष्ण व्योन आसान॥
 परमु ग्वरु दीव गोपीनाथ भगवान॥०॥

ओंकार स्वरूप सुय ओंकार,
 बॅखत्यन छु दिवान बवुसरु तार।
 सर्व व्यापक सुय चोर वीद पुरान॥
 परमु ग्वरु दीव गोपीनाथ भगवान॥०॥

नॅख्य डॅख्य बॅखत्यन बॅड असुंज़ सथ,
 सनम्वख बब यिवान ती मै हाजथ।
 गंगा जी, जमना जी छस अथु बुथ छलान॥
 परमु ग्वरु दीव गोपीनाथ भगवान॥०॥

कर्मवान धर्मवान कौत्याह महान,
 येम्य सुंदन बॅखत्यन छु म्योन प्रणाम।
 तिहंदी धर्म मै ति टोठी मस्तान॥
 परमु ग्वरु दीव गोपीनाथ भगवान॥०॥

‘विश्वास’ बबु सुंदी विश्वासय,
 छु विसान छु बबस टोठ दासय ।
 अशि गरान म्वखतु मालु छुस नॉल्य त्रावान ॥
 परमु ग्वरु दीव गोपीनाथ भगवान ॥० ॥

जाय छय थज़रस तस जानानस

जाय छय थज़रस तस जानानस,
 सुय छुय पानस अन्दर ।
 मोर त्रावि पथ कुन मोली लामकानस ।
 सुय छुय पानस अन्दर ॥० ॥

रुच क्रय ख्यन दिस अमर्यथ चावी,
 हावी पनुनुय ज़हूर ।
 छिनु बकार धनु द्वार तस धनुवानस ॥
 सुय छुय पानस अन्दर ॥० ॥

दूर छुय नु सुत्य छुय शाह चोन सुय छुय,
 गछि कुठि छुय बिहिथ वनि कड़तन ।
 पूज कर हनि हनि तंदिस नूरानस ॥
 सुय छुय पानस अन्दर ॥० ॥

त्रे ति सुय, मे ति सुय, सतसंगु सोज़ सुय,
 ओंकारु स्वरूपस बरुहस लोल ।
 सत संग टोठ छुय तस यज़दानस ॥
 सुय छुय पानस अन्दर ॥० ॥

कम छी चॉन्य मेथुर, वनि कडतख शैथुर,
यिम शैथुर ग्वडु वाय तिमनय लैतुर।
मूल तिमन गालुन्य वन भगवानस॥
सुय छुय पानस अन्दर॥०॥

दोह तारु यितु योर यथ संसारस,
दजु वनिस नारस फ्वल्यम गुलज़ार।
पान वंदु ग्वरु दीव गोपीनाथ भानस॥
सुय छुय पानस अन्दर॥०॥

विश्वास वॉस छेनु ज़ांह काँसि सोरान,
पोज़ प्यवान फेरून यिनु गछुनस।
तथ हेरि टख दियि मंग भगवानस॥
सुय छुय पानस अन्दर॥०॥

ज्ञानुच कथ छय दारुन ध्यान

ज्ञानुच कथ छय दारुन ध्यान,
ओंकारु स्वरूपस रोज़ पूजान।
ओंकारु स्वरूपय परमेश्वर ज्ञान॥
ओंकारु स्वरूपस रोज़ पूजान॥०॥

वासनायन दितु ग्वडन्यथ छल,
अथ बुथ छेलिथुय वात सुमन बल।
मंज ब्रुकूटी यियि सुय प्रकाशमान॥
ओंकारु स्वरूपस रोज़ पूजान॥०॥

न्यर्मल बाव थाव तिय गछी जान,
 ग्वडु न्यथ पनुनुय प्रजनाव पान ।
 खँन्य खँन्य नेरि नँन्य पानु स्वनुकान ॥
 ओंकारु स्वरूपस रोज़ पूजान ॥० ॥

ख्यमु क्याह चमु क्याह कथ छु सनुन,
 प्रारब्ध यी आसि वाति ब्रौह कुन ।
 अँगनस स्वाहा छुय हुमुन पान ॥
 ओंकारु स्वरूपस रोज़ पूजान ॥० ॥

ज्ञानु ध्यानु यलु गछन दारि तु बर,
 वक ज्ञान गँनीमत चेर मसौं कर ।
 शक्ती पूज कर बखति बावु सान ॥
 ओंकारु स्वरूपस रोज़ पूजान ॥० ॥

सरु कर खम निशि यूगीश्वरस,
 शक्ती हुंदिसुय टौठिस वरस ।
 महा गणेश छुय यिमन टोठ संतान ॥
 ओंकारु स्वरूपस रोज़ पूजान ॥० ॥

जायि जायि मायि होत तस बर लोल,
 यार दोस बांधव सुय मॉज मोल ।
 विश्वासु गरु सुय मंज तपोवन ॥
 ओंकारु स्वरूपस रोज़ पूजान ॥० ॥

ओंकार स्वरूपस परमेश्वरसुय

ओंकार स्वरूपस परमेश्वरसुय,

पूजा बु करु सुय बखति बावु सान ।

ॐ ॐ ओमु शब्दु ध्यान बो करुसुय ॥

पूजा बु करु सुय बखति बावु सान ॥० ॥

ज्ञानु ध्यानु तपु जपु लोलु बॅखती सुत्य,

मोल सोन छु करान रॉछ बॅखत्यन ।

तस बबस विज़ि विज़ि बु ति लोल बरुसय ॥

पूजा बु करु सुय बखति बावु सान ॥० ॥

महा लॅक्ष्मी सहित तस वनान विष्णु,

तस वनान लॅक्ष्मी नारायण ।

स्वय सुत्य शक्ती शिव शंकरुसुय ॥

पूजा बु करु सुय बखति बावु सान ॥० ॥

अखण्डु ब्रह्मांड सुय परमात्मा,

ब्रह्मा विष्णु सुय छु महेश ।

व्यापक हनि हनि तस बगॉर कांह नु छुय ॥

पूजा बु करु सुय बखति बावु सान ॥० ॥

मूल आधार छुय सुय बस पानय,

सुय प्रकृथ तय सुय क्वदरत ।

जगतन सूजीवुत तस अन्दर कांह नु छुय ॥

पूजा बु करु सुय बखति बावु सान ॥० ॥

राधिका पानय सुय कृष्ण पानय,
 य्वग् य्वग् दारान सुय कृष्ण अवतार ।
 बॅखत्यन तार दिवान सुय बवुसरसुय ॥
 पूजा बु करु सय बखति बावु सान ॥० ॥

रंगु मोत छुनु मंगान धनु तय द्वारुय,
 तस बस ख्वश करान टॉठ बॅखती ।
 क्षणु क्षणु रॉछ दर सु बॅखत्यन गरसुय ॥
 पूजा बु करु सय बखति बावु सान ॥० ॥

मूला धारस छुनु ऑन्था कुने,
 ऑंकारु स्वरूपय व्यापक सुय ।
 विश्वास जंगतन भक्ति वत्सलसुय ॥
 पूजा बु करु सय बखति बावु सान ॥० ॥

ओमय ज़पतो

ओमुय ज़पतो, ओमुय स्वरतो ।
 ओमुय सुतिन थॉविथ लय ॥
 गछी दूर ज़न्मु ज़न्मुच खय, गछी दूर ज़न्मु ज़न्मुच खय ॥
 ओमुय साकार न्यराकार ओम ।
 ओमुय सूहम हमसू ओम ॥
 ओमुय तत सत ओमस कर जय, ओमुय सुतिन थॉविथ लय ॥
 ओमुय ब्रह्मा ओमुय विष्णु ।
 ओमुय शक्ति सहित शंकर ॥
 परमु शिव गव ओमुय सोरुय, ओमुय सुतिन थॉविथ लय ॥

शठ चैक्र योर ओमय लल द्यद पेंच ।
 तु वॉच सॅत्यमिस परमु दामस ॥
 ओमय सुत्य ओमय ललद्यद छय, ओमय सुतिन थॉविथ लय ॥
 ओमय पूजान रूद भगवान ।
 अमर छुय गोपीनाथ भगवान ॥
 दिवान बॅखत्यन ओमुकय सुय पय, ओमय सुतिन थॉविथ लय ॥
 यि गव जॉव्यजार लबख भव तार ।
 ज़पुन गोविन्द छु सुय ओमकार ॥
 थवुस बखॅती हवालु ग्वडु सय, ओमस सुतिन थॉविथ लय ॥
 ज़ानुक थज़र गव दारून ध्यान ।
 तसुंद मनि मंज़ जॉनिथ थान ॥
 सदा ॐ ॐ ॐ परान रोज़य, ओमस सुतिन थॉविथ लय ॥
 करान 'विश्वास' रोज़ ओमकारु ध्यान ।
 द्युतुय भवनीश्वरी सुय ज्ञान ॥
 ओमय ज्ञानतन स्व पानय छय, ओमस सुतिन थॉविथ लय ॥

श्री हरी संजुय गॅनिराव माय

श्री हरी संजुय गॅनिराव माय,
 वयक्वॅठस छय बॅखत्यन जाय ।
 तति न सॉ रोजान तस कांह छाय ॥
 वयक्वॅठस छय बॅखत्यन जाय ॥०॥

शीशि नागस प्यठ व्यराजमान,
 बैखत्यन हुंदी ज़ार बोज़ान ।
 खीरु सागर लोलु मारान ग्राय ॥
 वयक्वंठस छय बैखत्यन जाय ॥० ॥

साकार पानु सुय ओम न्यराकार,
 व्यराजमान मंज़ मनि ज्ञानु ध्यानु व्यचार ।
 दौगन्यार दूर वॅसिथ छय बस काय ॥
 वयक्वंठस छय बैखत्यन जाय ॥० ॥

हरी हरी गारुन हर जायि सुय,
 सुय म्योन बब मॉज ग्वरु दीव सुय ।
 तस वनान रंगु मोत जंगी आय ॥
 वयक्वंठस छय बैखत्यन जाय ॥० ॥

दूर मसॉ चल तुल व्यूर डलस,
 बरजस्तु पम्पोश फौल्य व्वंदस ।
 मूलय चालान सैम्बि हुंज़ ग्राय ॥
 वयक्वंठस छय बैखत्यन जाय ॥० ॥

विष्णु पार ब्रह्म शै चॅक्र पर,
 भू मंडलन युस कॅरिथ व्यस्तार ।
 अज़पा ज़प ओम तॅथ्य बर माय ॥
 वयक्वंठस छय बैखत्यन जाय ॥० ॥

‘विश्वास’ राम छुय मनि मंदरस,
 कर कर्म रुत्य रुत्य कर्मु क्षेत्रस ।
 ओमकिस सारस न्यथ बर माय ॥
 वयक्वंठस छय बैखत्यन जाय ॥० ॥

श्री हरी संज्ञ राय यस गनि मने

श्री हरी संज्ञ राय यस गनि मने,

तस यियि वने पार ब्रह्म राम ।

ओमकारु स्वपरूप युस मंज्ञ मनि खने ॥

तस यियि वने पार ब्रह्म राम ॥० ॥

गोविन्द गू बॅनिथ गोकुल वने,

पोशिनूल बोल बोश करी प्रभातन ।

गोश थावि होशदार बॅखती सने ॥

तस यियि वने पार ब्रह्म राम ॥० ॥

पंजरस मंज्ञ बंद तोतु ती बोलि,

य्वसु बूल्य बोलान रोजि खानुदार ।

तोतु येलि बरि चलि कति प्रुछि तने ॥

तस यियि वने पार ब्रह्म राम ॥० ॥

चु नु कांह बु नु कांह युस कांह कॅम्य वुछ,

सुय कांह छद्यारान द्यन राथ ।

ग्वरु वाकु लल द्यद पॅच तमि ड्यूठ मने ॥

तस यियि वने पार ब्रह्म राम ॥० ॥

सत संगु रठ संग तेलि गछी दूर जंग,

रंगु रंगु बोलि बोल बोल बोशाह ।

सथ व्यचारु सत ग्वरस नेमि तॅम्यसुय मने ॥

तस यियि वने पार ब्रह्म राम ॥० ॥

‘विश्वास’ वुनि छुख द्वद चुय ओमुय,
 ज्ञाग छय त्रावन्य ज़ोव रु निसुय ।
 थॅन्य चॉन्य ग्यव बनि पोन्थ तथ नने ॥
 तस यियि वने पार ब्रह्म राम ॥० ॥

ओमुसुय पशराव पांछ त्वत पान

ओमुसुय पशराव पांछ त्वत पान,
 ओमुय ज्ञान मनस मंज ।
 ॐ नाम् स्मरणि प्राव न्यर्वान ॥
 ओमुय ज्ञान मनस मंज ॥० ॥

ओमुय अन्दर ओमुय न्यबर,
 अखंड ब्रह्मांड ओमुकार ज्ञान ।
 ध्यान दार ओमकार् प्रज्ञाव पान ॥
 ओमुय ज्ञान मनस मंज ॥० ॥

सादन संतन पय ओमकारुक,
 गारुख पानय यिन सनम्बख ।
 अष्टु स्यद प्रावख वुछख भगवान ॥
 ओमुय ज्ञान मनस मंज ॥० ॥

ग्वडु बर बॅखती लोल तय माय,
 शेरुस जाय शेरस प्यठ ।
 ज्ञानु ध्यानु दारनायि प्रज्ञलाव पान ॥
 ओमुय ज्ञान मनस मंज ॥० ॥

अखंड ब्रह्मांड योग दीवताह ओमकार,
 साकार न्यराकार फोल गाशि अंबर ।
 विराठ स्वरूपस करुस ग्वणु गान ॥
 ओमुय ज्ञान मनस मंज ॥० ॥

लछि नावु नोन सुय ओमकार पानय,
 लछि बँद्य रुफ सुय दारानय ।
 लछि नोव मे गछि कुठि छुय विराजमान ॥
 ओमुय ज्ञान मनस मंज ॥० ॥

ज्ञपि युस ओम ओम रंदि नेरि जान,
 विष्णु स्वरूपस दोरिथ ध्यान ।
 'विश्वास' तनु मनु रोजि पूजान ॥
 ओमुय ज्ञान मनस मंज ॥० ॥

कोर जंगलव द्राख मँथिथ सूर लोलो

कोर जंगलव द्राख मँथिथ सूर लोलो,
 मनि छारुन यार छुन दूरि लोलो ।
 द्वद छु छँकरान कडान थँन्य चूरि लोलो ॥
 मनि छारुन यार छुन दूरि लोलो ॥० ॥

बन चु राधिका, श्यामा बन चु जसदा,
 बन दीवकी वासुदीव प्राव जलवा ।
 रछनि कामदीन बन चु नन्दु गूरु लोलो ॥
 मनि छारुन यार छुन दूरि लोलो ॥० ॥

गथ शमहस रोज करन यिनु ह्यख पथ,
कुन पार ब्रह्म थव व्वन्दस तेंम्य सुंज सथ ।

अँश्कु नारय दजि पोंपूर लोलो ॥

मनि छारुन यार छुनु दूरि लोलो ॥० ॥

कुन ओमकार सारिनुय स्वर्गस द्वार,

युस ज़पि ओम सुय लबि बवुसरु तार ।

लय गछी सुय नूरस नूर लोलो ॥

मनि छारुन यार छुनु दूरि लोलो ॥० ॥

परम शक्ती बँखती बु करु हॉसिल,

ज्ञानु ध्यानस सुती बनख वॉसिल ।

ला मकानस लय गछख पूर लोलो ॥

मनि छारुन यार छुनु दूरि लोलो ॥० ॥

छेनु सँहल कथ मेलुन्य मनशि काया,

छारुन ओमकार गारुन बरुन माया ।

कोर छुय गछुन खँसिथ कोहि तूर लोलो ॥

मनि छारुन यार छुनु दूरि लोलो ॥० ॥

बेह ग्वफि मंज अनि गटि गटु गछी दूर,

रोज़ि हर सू च़े प्रकाश प्रज़ली नूर ।

परम शक्ती बनी कनु दूर लोलो ॥

मनि छारुन यार छुनु दूरि लोलो ॥० ॥

प्वनि कर्मव नेर तीर्थन लय बर,

छी सॉरी तीर्थ च़े पानस अंदर ।

वस सनिरस लबुन दुर पूर लोलो ॥

मनि छारुन यार छुनु दूरि लोलो ॥० ॥

अकि शाह छुय त्रावुन मोर पथ कुन,
 यिनु गछुनच हेर मंगुस व्वन्य बखशुन ।
 नार् कार पान नोन नेरि नूर लोलो ॥
 मनि छारुन यार छुनु दूरि लोलो ॥० ॥

लल दैदि नोन वोन तस ग्यूल आलमन,
 लूक पामय कनव बोज़ु श्रु रामन ।
 वॅछ हा सुता जी भूमि कॅर मंज़ूर लोलो ॥
 मनि छारुन यार छुनु दूरि लोलो ॥० ॥

बोज़ 'विश्वास' परमु शिवु संज ङ्कती मील्लिथ,
 अदु पतु छ्यतु गछी नु ज़ांह तस मेली ।
 ज़िन्दु मरि युस रिंदु नेरि पूर लोलो ॥
 मनि छारुन यार छुनु दूरि लोलो ॥० ॥

वीद नय ज़ानख सारस सनतो

वीद नय ज़ानख सारस सनतो,
 सार छुय ओमकार ती वनतो ।
 कारण तारन सू हम बनतो ॥

सार छुय ओमकार ती वनतो ॥० ॥

वॉन्सि मॅशरोवुथ कलपन मनतो,
 यिनु तय गछुनच गिनती वन ।
 क्याह छुय हॉसिल यिमन कलपनतो ॥
 सार छुय ओमकार ती वनतो ॥० ॥

सौरुय सम्सार सौपनाह ज़नतो,
 अँछ वँट्यथुय युथ अन्दाकार पुर।
 पोज़ छुय पॅरम शिव स्व प्रकाश बनतो।।
 सार छुय ओमकार ती वनतो।।०।।

माया त्रॉविथ कायायि सनतो,
 कति आयि किछ छय अथ मंज़ छु क्याह।
 वांति वस सँदरस डुंगल बनतो।।
 सार छुय ओमकार ती वनतो।।०।।

यिनु तय गछुनचि मालि च़ठ पन तो,
 वसतो सनिरस च़ेय अथि लगी लाल।
 म्वलु रोस दुरलब वॉसिल बनतो।।
 सार छुय ओमकार ती वनतो।।०।।

कतुराह सँदरस निशि छुख छ्यनुतो,
 हँदुरान आमुत ह्यनुरन मंज़।
 सँदरस मीलित्थ सँदराह बनतो।।
 सार छुय ओमकार ती वनतो।।०।।

‘विश्वासु’ कवितायि वज़ुनाव पन तो,
 शमु दमु स्वय कत द्यन क्यो राथ।
 मन च़्यथ डंजि थाव तत सत बनतो।।
 सार छुय ओमकार ती वनतो।।०।।

मनु वनतो सनुवुन चुय

(अ)

मनु वनतो सनुवुन चुय ।

भ्रम छु संसार शम कुनुय ॥

पानु निशि ना छुय ब्योनुय ॥

भ्रम छु संसार शम कुनुय ॥० ॥

वारु वुछ तव दार व्रवपुरिथ,

सोन समन्दर येंच पुरिथ ।

लाय व्वठ डुंगलु तति चुय,

संगि पारस खारुनुय ॥

भ्रम छु संसार शम कुनुय ॥० ॥

छुनु मुश्किल योद करख कल,

व्वथ वुछुस वोंत वस चुय तल ।

ता अबद हॉसिल बनी ज़य,

छुय नु अदु केंह छारुनुय ॥

भ्रम छु संसार शम कुनुय ॥० ॥

(ब)

मनु वनतो सनुवुन चुय ।

भ्रम छु संसार शमतो कुनुय ॥

अछ चु अन्दर लोलु मंदर,

थव सजॉविथ शूबिदार ।

चेश्म मुचराव अँत्य बिहिथ छुय,

श्याम स्वंदर ताजदार ।

अखंड ब्रह्मांडस सर्व व्यापक,

तस अन्दर ना कांह ति छुय ।

भ्रम छु संसार शमतो कुनुय ॥० ॥

व्वथ चु वुछ असवुनि दहानय,

श्रु राम सुंद मंदर शूबवुन ।

व्वलु हनाह ब्रोंह कुन चु पख,

शिवालु शिव सुंद लूबवुन ।

सुश्रु राम मंदर, सुय शिवालय,

द्वशवय कुनुय मयखानु छुय ।

भ्रम छु संसार शमतो कुनुय ॥० ॥

वुछ चु साक् य बाँगरावान,

छुय बरान ब्योन ब्योन जाम ।

केंह गँमुत्य चथ केंह छि प्रारन,

केंहन छे मदहोशी ताम ।

रठ लोलु तय मायि छुय दिवान,

जामि जम ह्यथ पानु छुय ।

भ्रम छु संसार शमतो कुनुय ॥० ॥

‘विश्वास’ सान रोट त्रै यन,

वुन्यक्यन स्यठाह तस आँस त्रेश ।

लोलु सुती बाँगरान आस,

मायि सानुय गव सु पेश ।

ओम खँनिथ मनस छुस तवय,
तस पतन देवानु छुय ।
भ्रम छु संसार शमतो कुनुय ॥० ॥

मन वनतो सनुवुन चय ।
भ्रम छु संसार शमतो कुनुय ॥

सोरूय मॅशरुन त्रावुन येत्ययॉय

सोरूय मॅशरुन त्रावुन येत्ययॉय,
सन्य च्यथ चन्दु बर सू हम सू ।
तोर नाय बेयि कैह न्युन सुत्य लॅत्ययॉय ॥
सन्य च्यथ चन्दु बर सू हम सू ॥० ॥

सुलि व्वथ तुलमुलि छुय नागरादाह,
रॉगिन्या अमीह विजि बाग शेरानु ।
जल गछ माजि लाग पोश लवु हॅतियॉय ॥
सन्य च्यथ चन्दु बर सू हम सू ॥० ॥

बागस फेरान ज़ागि रोज आगस,
द्रागस मागस सुय यियि बकार ।
पूजायि लाग तस पोशे फोतियॉय ॥
सन्य च्यथ चन्दु बर सू हम सू ॥० ॥

लोल बर कुकिलय शब्द बोजनावान,
गूव्यन्दु गूव्यन्दु तथ थाव ध्यान ।
ओम शब्द प्रावतस ब्रोंठु तय पॅत्ययॉय ॥
सन्य च्यथ चन्दु बर सू हम सू ॥० ॥

ओमकार् स्वरूपय नूरि नूरानय,
 सुय प्रज़लानय अ, ओ, म ।
 ईश्वर मौलिक तति तय येतियाँय ॥
 सन्य च्यथ चन्दु बर सू हम सू ॥० ॥

हवसन द्रोत दिख गासु ह्वखु नावख,
 रोजि शादाब अदु चोन गुलिस्तान ।
 छुय गुलिस्तानस मंज़ नूर मोतयाँय ॥
 सन्य च्यथ चन्दु बर सू हम सू ॥० ॥

योद खसख चु कोहन तति क्याह लारी,
 कुन कुल यस ज़न मुश्क अंबार ।
 ला मकान मंज़ मनि प्रज़नुन येतियाँय ॥
 सन्य च्यथ चन्दु बर सू हम सू ॥० ॥

ओमु शब्दु ललदेदि ज़ाँव्युल कोतयाँय,
 तथ दोपनस हशि त्राव सँदरस ।
 दीवु आसन तथ पम्पोश खँत्य याँय ॥
 सन्य च्यथ चन्दु बर सू हम सू ॥० ॥

यूगु बलु लल देदि प्रोव सतग्वरस होवुन,
 ओमकार् स्वरूपय सत सम्सार ।
 ओमुसुय लय गँयि ललद्वद येतियाँय ॥
 सन्य च्यथ चन्दु बर सू हम सू ॥० ॥

लोलु वाख अकि विज़ि शोलु हसॉ मारन,
 कौतिहन तारन बवुसरु अपोर ।
 लोलु वाख अर्शिक्य तोरय वँथियाँय ॥
 सन्य च्यथ चन्दु बर सू हम सू ॥० ॥

सर छुम सदा खम छम खबर पानस,
जानि जानानस बावतस खबर ।
'विश्वास' तैम्य सुंद सूरय मोतयॉय ॥
सन्य च्यथ चन्दु बर सू हम सू ॥० ॥

दारु होर म्वकलिथ गरु छुय त्रावुन

दारु होर म्वकलिथ गरु छुय त्रावुन,
अदु छुय छावुन पोज़ गुलज़ार ।
क्षण क्षण श्रु हरी ध्यानस थावुन ॥
अदु छुय छावुन पोज़ गुलज़ार ॥० ॥
दारि बर त्रवपरिथ सत छु व्यचारुन,
कुन ओम बस कर अथ पूजा ।
ॐ ॐ ॐ ज़पान ॐ पान बनावुन ॥
अदु छुय छावुन पोज़ गुलज़ार ॥० ॥
सँति सुमि सँदरस तार छुय बनावुन,
सतुवय सुम छस कुन ओमकार ।
स्वनु थम तथ गॅरिथ सूहम प्रावुन ॥
अदु छुय छावुन पोज़ गुलज़ार ॥० ॥
रंगु रंगु रूपन ध्यान छुय थावुन,
क्याह खबर कमि रूपु हावि दर्शुन ।
सति रंगु रंगुविथ पान छुय थावुन ॥
अदु छुय छावुन पोज़ गुलज़ार ॥० ॥

मनु नागरादस जाग ह्यथ रोजुन,
 द्रेंठ गछी पानसुय यियी सनम्बख ।
 माजि रॉगिन्यायि कंद छुय बावुन ॥

अदु छुय छावुन पोज़ गुलज़ार ॥० ॥

रुत तय कुत तिम छी परखावन,

प्रावन थावन सम द्रष्टी ।

काँसि हुंद दामानु छुनु मंदुछावुन ॥

अदु छुय छावुन पोज़ गुलज़ार ॥० ॥

यार् सुंद अनुहार छुय प्रज़नावुन,
 सासु सिरयचि प्रज़लान छुस शुहुल तीज़ ।

तथ तीज़स छुय सर नोमुरावुन ॥

अदु छुय छावुन पोज़ गुलज़ार ॥० ॥

अथ येंदरस छुय योनि पान खारुन,

अदु छुस ज़ाल्यन छावुन तील ।

राहि रास अदु पकी रुत कतु नावुन ॥

अदु छुय छावुन पोज़ गुलज़ार ॥० ॥

कतु वुनि पनु दावि कुन जजर थावुन्य,

यिनु पन छेनि पेयि बेयि शेरुन ।

नविसरु कतुनस नोव ध्यान थावुन ॥

अदु छुय छावुन पोज़ गुलज़ार ॥० ॥

दूनिथ कैल्य फम्ब होश छुय थावुन,

नारु ज़ितिनि यिनु गछि सॉरयसुय सूर ।

बॅखती, ज्ञानु, ध्यानु कॅल्य कॅल्य त्रावुन ॥

अदु छुय छावुन पोज़ गुलज़ार ॥० ॥

काहँनोव येत्य छुय 'विश्वास' चोनुय,
लछि नोव मनि चानि मंज विराजमान ।
गछि कुठि तँहंदि सुत्य छुय प्रजलावुन ॥
अदु छुय छावुन पोज गुलजार ॥० ॥

टुकि पॅक्य पॅक्य छुय पान थॅकुरावुन

टुकि पॅक्य पॅक्य छुय पान थॅकुरावुन,
वति बनि अथवास ल्वति ल्वति पख ।
ग्वडु दिख मन वासनायन ब्रख ॥
वति बनि अथवास ल्वति ल्वति पख ॥० ॥
तथ वति छारुन मनुचे दारे,
हारे हारे कर सन्य च्यथ ।
अकि विजि नारस पान चोन खारुन ॥
वति बनि अथवास ल्वति ल्वति पख ॥० ॥
तति यियि नु कांह ब्रोंह द्युन जवाब पानस,
वानस प्यठ आसी ह्यथ बॅही सुय ।
क्याह पताह कूत काल तति पेयी प्रारुन ॥
वति बनि अथवास ल्वति ल्वति पख ॥० ॥
अख क्षण छयन छुनु कर्मचि नावे,
तारन वोल् सुय कुनुय ओमकार ।
ओमकार स्वरूपय पान प्रजनावुन ॥
वति बनि अथवास ल्वति ल्वति पख ॥० ॥

कर्मचि नावे कौन्सि केह नु रावे,

तोलनस क्षणु क्षणु पानय सुय ।

तस डंडी दारस पान पुशरावुन ॥

वति बनि अथवास ल्वति ल्वति पख ॥० ॥

तस मंग बैखती तस मंग ज्ञान,

दारनायि तैम्य संजि दारुस ध्यान ।

सतुचे स्मरणि सत सुय व्यचारुन ॥

वति बनि अथवास ल्वति ल्वति पख ॥० ॥

सत सुय पानय, शांत सुय पानय,

सुय यूगियन हुंद 'विश्वास' ।

मंज मनि छुय गुप्त गारुन तु छारुन ॥

वति बनि अथवास ल्वति ल्वति पख ॥० ॥

पारस बनावान शैसतुरस स्वन

क्षणु क्षणु ध्यान दार बस ओंकारस,

पारस बनावान शैसतुरस स्वन ।

गुलजार छु फवलान दज्जु वनिस नारस ॥

पारस बनावान शैसतुरस स्वन ॥० ॥

शैशतुर कौरिथ शैशतुरय रोजान,

स्वन कौरिथ छुनु बनान सरतल ।

सरतलि म्वल छुनु निशि सरकारस ॥

पारस बनावान शैसतुरस स्वन ॥० ॥

नारु कार वुनि मा छय दौन्य सरतल,
 बर तल प्रारुस जाग ह्यथ चुय ।
 जल गछ थफ दिस अजलुकिस यारस ॥
 पारस बनावान शैसतुरस स्वन ॥० ॥

दोनि मंज बोनि कुल कव वीरि वारस,
 बडि बोड गछी दियी सायि शैहजार ।
 करि क्याह सँहलाबु दकु रँमब्य आरस ॥
 पारस बनावान शैसतुरस स्वन ॥० ॥

दून्य जौलिथ अवु म्वखु बोनि रोजुस,
 सोज रोज वायान, बोज पानस ।
 तारि हुंद सोज छुय टोठ ताजदारस ॥
 पारस बनावान शैसतुरस स्वन ॥० ॥

जामु रंग पनुनुय ओमुके रंगय,
 सुय रंग टोठ छुय सूरमँतिसुय ।
 अदु बनी चै ति जाय तति शिवु दारस ॥
 पारस बनावान शैसतुरस स्वन ॥० ॥

दारि बर त्रौपरुख यारु सुंजि माये,
 जाय छय तँमिसुंज मंज जिगरस ।
 तस कर मनि पूज सन ओमु सारस ॥
 पारस बनावान शैसतुरस स्वन ॥० ॥

‘विश्वास’ सान बोज ओम छय सोरुय,
 ग्वर सुय आलव वुजुनावान ।
 लोल बर ओमुसुय अछ ओमु दारस ॥
 पारस बनावान शैसतुरस स्वन ॥० ॥

बु छारन कति बालु बालय यार

बु छारन कति बालु बालय यार,

दियम दीदार मनस अन्दर ।

सु छुम म्योन गुल बु बेकस खार ॥

दियम दीदार मनस अन्दर ॥० ॥

चंद्र शूबान डेके छुम तस,

सु छुम मस पानु मस चाव्यम ।

हजर जदुसुय फवल्यम गुलजार ॥

दियम दीदार मनस अन्दर ॥० ॥

कनन छिस वॉल्य चंदुनक्य नॉल्य,

छु फेरान आसुवुन बॉल्य बॉल्य ।

वसान जेटि मंजु छस गंगुदार ॥

दियम दीदार मनस अन्दर ॥० ॥

हॅटिस छुस शामु रंग शूबिदार,

वनान छिस नील कंठ मुकटुदार ।

सदा शिव म्योन छुय गमखार ॥

दियम दीदार मनस अन्दर ॥० ॥

तसंज शक्ती यछान बॅखती,

दिवान कलि कालुक्यन म्वक्ती ।

छे वालान पापु शापुक्य बार ॥

दियम दीदार मनस अन्दर ॥० ॥

अथे ह्यथ अमरयतुक कलु शाह,
छि वायान डाबराह यकजा ।
वनान अँमिसुय छि त्रै नेथुरदार ॥
दियम दीदार मनस अन्दर ॥० ॥

चोत्र बोज़ रुप सुय विष्णु,
छु ह्यथ गद्दा, शंख, पदम यकसू ।
स्वदर्शन चँक्र ह्यथ शूबिदार ॥
दियम दीदार मनस अन्दर ॥० ॥

बसुम मँलिथुय छु म्योन जूग्याह,
दियम आज्ञा वन्यम सनम्बख ।
ज़पान रोज़ बुय छुसय ओंकार ॥
दियम दीदार मनस अन्दर ॥० ॥

अर्ज़ म्योन जानि जानानस,
लगस पादन मे ति दियि ह्यस ।
वन्यम बवुसरु दिमय पानुतार ॥
दियम दीदार मनस अन्दर ॥० ॥

लगय म्यानि आगु वंदय सौरुय,
यि कैह छुम, छुम अमानत चोन ।
यितम सनम्बख मे बारम्बार ॥
दियम दीदार मनस अन्दर ॥० ॥

बु छुस कलि कालुनय वौलमुत,
अँन्दरय हन हन बु छुस गोलमुत ।
करुम पनुनुय मे साक्षातकार ॥
दियम दीदार मनस अन्दर ॥० ॥

छु 'विश्वास' यारुसुय प्रारान,
 तु चेशमव लोला ओश हारान ।
 जगत ज़ननी वसीला दरकार ॥
 दियम दीदार मनस अन्दर ॥०॥

पानस रँटिथ फँकीरी

पानस रँटिथ फँकीरी, बँखत्यून दिवान अँमीरी ।
 अँम्युं सुंज यि दस्तगीरी ॥
 छय बे मिसाल वैसियाँय ॥०॥
 पज़ि तस छे टाँठ बँखती, यस आसि तस नु सखती ।
 सास सिरियि गाश शुहुल तस ॥
 सुय बा कमाल वैसि यॉय ॥०॥
 नुन्दु बोन छु सूर मँलिथुय, मृगुछाल सु तनि छु वँलिथुय ।
 म्वनि फोल्त्र वतन सजॉविथ ॥
 बँखत्यून छि लाल वैसियाँय ॥
 नूरन हुन्दुय छु अंबार, तॉबीन तँमिस छि बिस्व्यार
 हटि तस छि नॉल्यु शहमार ॥
 बैयि रवंडुमालु वैसियाँय ॥०॥
 चँन्द्रमु डेके छुस शुँबान, गंगा जी जेटि छस लूबान ॥
 शत्की शिवस छे प्रमान ॥
 तॉबीन काल वैसियाँय ॥०॥
 लछि नोव मस छु पानस, बस लीन श्रु रामस ।

मनु पूज करान छु बस तस ॥
 जपु तप तु माल वैसियोय ॥० ॥
 त्रिलोकी नाथ पानस, नज़राह थैविथ जहानस ।
 कॉलास परबतस प्यठ ॥
 तति शीनु बाल वैसियोय ॥० ॥
 'विश्वास' सुय छु श्रु राम, ब्योन कांहनु कुन छु भगवान ॥
 श्रु राम ति तस छु पूजान ॥
 ऊँ बा जलाल वैसियोय ॥० ॥

अख हवस ओसुय च़े सीरी

अख हवस ओसुय च़े सीरी,
 छय अँसीरी ती चु वन ।
 परमु शिवु सुंज दस्तगीरी ॥
 छय अँसीरी ती चु वन ॥० ॥
 टाँठ शाहस छय फकीरी,
 खर्कु पोशन सुय थज़र ।
 खर्कु पोशन तस बँसीरी ॥
 छय अँसीरी ती चु वन ॥० ॥

जानि जानान छुय कैहन प्यठ,
 लोल छिस खंडरात बरान ।
 पोशि चमनन स्वख ती सु जॉरी ॥
 छय अँसीरी ती चु वन ॥० ॥

जूग्य सैन्ययाँस्य यूग सुती,
 बूग बूगान छी न सौँ ।
 राज होन्ज दस बस्तु सौरी ॥
 छय अँसीरी ती चु वन ॥० ॥

लोलु डलस पम्पोश फोल्मुत्य,
 पूजि लागस दिलबरस ।
 नागरादन फीर्य फीरी ॥
 छय अँसौरी ती चु वन ॥० ॥

राघायि निशि छुनु जुदा शाम,
 सुतायि निशे सुय छु राम ।
 शक्की शिवस सुत्य ऊँ छि सौरी ॥
 छय अँसीरी ती चु वन ॥० ॥

बन चंदन कुल हाथ मुशिक अंबार,
 रौछ करनय कुलमार शहमार ।
 अदु चै चटुनस कांह मा पोरी ॥
 छय अँसीरी ती चु वन ॥० ॥

जानुसुय वंदु जान पनोनय,
 जान कर जानानु बन ।
 जानि जानान करी चै यौरी ॥
 छय अँसीरी ती चु वन ॥० ॥

गथ करान पोंपूर शमहस,
 होल तँम्यसुंद लोल छुस ।
 कुन शमाह शोलान च्वपौरी ॥
 छय अँसीरी ती चु वन ॥० ॥

यिनु गछनुक्क्य दोह गछन पूर,
पेयि नु कोहन बेयि खसुन ।
यारु सुंदि सुत्त्य बनि स्व यॉरी ॥
छय अँसीरी ती चु वन ॥० ॥

यारु संजुय शौछ मै आयम,
हाव्यम दर्शुन पान सुय ।
नेर कर शाहबाजु सवॉरी ॥
छय अँसीरी ती चु वन ॥० ॥

थोवनम कँम्य एतबार,
'विश्वास' थोवनम नाव मेय ।
सुय वाख तँम्यसुंद रोज्यम जॉरी ॥
छय अँसीरी ती चु वन ॥० ॥

ॐ शम हम सू सूसू हम

ॐ शम हम सू सूसू हम ।
संसार जानतो बॉज्यगार ब्रम ॥
रजि रजि खँसिथुय प्राव मँज्जिल,
ग्वडु यिकुवटु प्राण तय दिल ।
छाव थाव बानस वारु दितु दम ॥
संसार ज्ञानतो बॉज्यगार ब्रम ॥० ॥

वावस मंज बठि ठँहराव नाव,
वारु वुछ डूरिजन पोन्त्य मा चाव ।

रबि रुदु निशि बॅचराव चम ॥

संसार ज्ञानतो बॉज्यगारु ब्रम ॥० ॥

ज्यादु जंजालुच मो कर कल,

सु हा छुय हथुवॅरय पुठ हॉकल ।

जलुर यिनु जालस बंद गछुहम ॥

संसार ज्ञानतो बॉज्यगारु ब्रम ॥० ॥

वानस प्यठ बेह वान्युत कर,

द्रवगि बावु कुनुनुच कल मोदर ।

श्रोग कुन चोर जेन परान सूहम ॥

संसार ज्ञानतो बॉज्यगारु ब्रम ॥० ॥

रठ ती यथ जुन पानु वातख,

ग्वबि बारु सुतिन ज्यादु थकख ।

मंज वति तिथु कॅन्यु गछुख बरहम ॥

संसार ज्ञानतो बॉज्यगारु ब्रम ॥० ॥

कम कम बलुवीर आमुत्यु योर,

पॉरिथ कर्मु बोर द्रामुत्यु तोर ।

कॅह द्रायि अडवती कस पौच यम ॥

संसार ज्ञानतो बॉज्यगारु ब्रम ॥० ॥

सर कर खम निजि ग्वरु वर,

यूगी पनुनुय शिव शंकर ।

छु सहित शत्की तॅम्यसुय नम ॥

संसार ज्ञानतो बॉज्यगारु ब्रम ॥० ॥

बन साँ साकय चाव जामि जम,
 मेति चाव चु.ति चे ज़ुपान सूहम।
 'विश्वास' सार ओम छुय सुबहु दम॥
 संसार ज्ञानतो बॉज्यगारु ब्रम॥०॥

पम्पोशि पादन डंडुवत प्रणाम

(चु पोद)

डंडुवत प्रणाम छुय पम्पोशि पादन,
 शीश म्योन माजि रॉगिन्यायि अर्पन।
 व्यापक हनि हनि माँज भवॉन्य् पानय
 दँहन दिशायन च्वन तर्फन

तुलमुलि 'रॉगिन्या पर्वतु 'शारिका
 जीठय यॉर स्वय ज़िष्टा माता।
 बहू फोर्टु 'कालिका रॉछ करान बँखत्यन॥
 शीश म्योन माजि रॉगिन्ययि अर्पण॥०॥

त्रिकूटा पर्वतस तथ दर्बारस,
 माता रानी तँती सनम्वख।
 ह्यथ लँक्ष्मी जी हुन्द्यन स्थानन॥

शीश म्योन माजि रॉगिन्ययि अर्पण॥०॥

उमा नँगरी उमा भवॉनी,
 तस माजि म्योन जय जय कार॥
 अँकिन गामि स्वय शिवा मनु मंदर पूजन॥
 शीश म्योन माजि रॉगिन्ययि अर्पण॥०॥

मंज गामि मंज जंगलस बिहिथ रॉगिन्या,
शेहजार बॅखत्यन क्युत करान चंदन कुल ।

वनुचे विगिने तस वन नावन ।।

शीश म्योन माजि रॉगिन्ययि अर्पण ।।० ।।

शैला भगवती वरमुलि नागस,

मनु किन्य् जाग ह्यथ तस रूजिथ ।

लोलु हॅत्य् विजि द्वद कंद बावन ।।

शीश म्योन माजि रॉगिन्ययि अर्पण ।।० ।।

त्रिपुरा स्वंदरी दिवुसरु जंगलस,

क्षण क्षण असि करान मंगल स्वय ।

सथ छम तॅम्य् सुंज न्यथ बु ति पूजन ।।

शीश म्योन माजि रॉगिन्ययि अर्पण ।।० ।।

खविकिस बालस प्यठ ज़ाला जी,

तति दुपु माला स्वंदर शूबिदार ।

आरती तस करान रत्न दीप ज़ालन ।।

शीश म्योन माजि रॉगिन्ययि अर्पण ।।० ।।

बर्गुशाखाये क्षण क्षण नमस्कार,

तॅम्य् सुंज सरकार छय मटन नाग ।

मार्तन्ड तीर्थस मनु पूजाह करन ।।

शीश म्योन माजि रॉगिन्ययि अर्पण ।।० ।।

गंगा जी, जमना जी, सरस्वती जी येति ज़न,

पवित्र नॅदियन हुंद संगम् ।।

नर्मदा, वितस्ता, पाप हरान बॅखत्यन ।।

शीश म्योन माजि रॉगिन्ययि अर्पण ।।० ।।

मनसा दीवी मनु किन्पू पूजन,
 हनु वनु घनु द्वार स्वय सोजन ।
 चंढी गड़ चन्डिका रछान तल पादन ॥
 शीश म्योन माजि रॉगिन्ययि अर्पण ॥० ॥

‘विश्वास’ युस थावि तॅस्य सुत्य शक्ती,
 तॅम्य सुय मनि मंज गनि बखती ।
 सासु नावु सासु रुप हावान दर्शन ॥
 शीश म्योन माजि रॉगिन्ययि अर्पण ॥० ॥

पादन लगयो हाव दर्शुन

पादन लगयो, हाव दर्शुन छम चॉन्य लादन,
 हा आशि तोशो, जान वंदयो कन थव मे नादन ।
 आश छम चॉनी सीरु बाजो डल मो चु वादन ॥
 हा आशि तोशो, जान वंदुयो कन थव मे नादन ॥० ॥
 बस्माह मॅलिथ, वॅलिथ मृगु छाल आसन दॉरी,
 दून्याह जॉलिथ, डमरू वायान त्रिशूल दॉरी ।
 कॉल्य् छी कनुनय जेटि गंगा आनन्द जन सादन ॥
 हा आशि तोशो, जान वंदुयो कन थव मे नादन ॥० ॥
 कैलाश वॉसी चेश्मु चाने छय मस खॉसी,
 डेकि छुय चॅन्द्रम, गाह त्रावान कासान व्वदॉसी ।
 हटि छुय त्रे वासुक लर्जु येम्य सुंद वड्यन शदादन ॥
 हा आशि तोशो, जान वंदुयो कन थव मे नादन ॥० ॥

जाय छथ रेंट मुच्च शुमशानन शिन्याह शयन,
 सँगी साँथी छी भूत प्रुथ तय बेयि रौद्रु गन ।
 मस्ती चाने पान हस्यती विष्णु छु पूजन ॥

हा आशि तोशो, जान वंदुयो कन थव मे नादन ॥०॥
 तीज चोन ताबान सासु भास्कर प्रजलान च्वपॉरी,
 त्रन बवनन मंज चोन महिमा छु काल सम्हॉरी ।
 रछिवुन चु जगतन जेय छी वनान नाव मधुसूदन ॥

हा आशि तोशो, जान वंदुयो कन थव मे नादन ॥०॥
 नाव चॉन्य लछि बेंद्य त्रे ग्वण छि चॉन्य त्रिबवनय,
 सतुकि स्वबावय टोठतम मे चु निरन्यजनय ।
 हावतम दर्शन सुत्य ह्यथ शक्ती प्राण म्याँन्य छी अर्पण ॥

हा आशि तोशो, जान वंदुयो कन थव मे नादन ॥०॥
 पापन तु शापन शिव नाथो करुवुन चु सम्हार,
 येमि संसारय शिव जियो बखशुम मे शोहजार ।
 लय कर मे पानस सुत्य आँखुर वातुम मे दादन ॥

हा आशि तोशो, जान वंदुयो कन थव मे नादन ॥०॥
 फुलयाह छे लेंजमुच्च बरजस्तु चानि नाव शोलान,
 मँस्ती अन्दर छुय मस गँछ्यथुय 'विश्वास' बोलन ।
 फवलुवनि म्वखु छुख म्यानि भगवान टोठान बँखत्यून ॥
 हा आशि तोशो, जान वंदुयो कन थव मे नादन ॥०॥

बैव्यनय जय नुन्दबाने

बैव्यनय जय नुन्दबाने,

सासु म्वखु शीशि नागु म्याने ।

अँस्य् हा आयि योर मायि चाने ॥

सासु म्वखु शीशि नागु म्याने ॥०॥

जलु सुय मंज छु चोन आसन,

नीलु नागु सनम्वख चु बासन ।

भय गछान दूर नावु चाने ॥

सासु म्वखु शीशि नागु म्याने ॥०॥

त्रावि युस चे नज़राह हैरि ब्वन,

सुय करान शिवु सुंज स्मरण ।

ध्यान मुद्रा सुय ज्ञाने ॥

सासु म्वखु शीशि नागु म्याने ॥०॥

शिव पानु ह्यथ पनुन्य् शक्ती,

छय अमर चॉनी बैखती ।

महिमा चोन छु बा माने ॥

सासु म्वखु शीशि नागु म्याने ॥०॥

सॉथी चे शूबिदार पर्वत,

ऑसी तु रोज़नय पतुवथ ।

शांत शीतल स्वभावु चाने ॥

सासु म्वखु शीशि नागु म्याने ॥०॥

‘विश्वासु’ सान युस चै निश आव,
 श्रानाह कॅरिथुय सुय द्राव ।
 अदु करान नमन ग्वफाये ॥
 सासु म्वखु शीशि नागु म्याने ॥० ॥

शिव नाथु यि सॉ सोन

शिव नाथु यि सॉसोन म्याँन्य् छय द्रुय,
 रोज़तम मे सातु सातु सनम्वख चुय ।
 चॉन्य् स्मरण छम मे बडि बॅड ज़िय ॥
 रोज़तम मे सातु सातु सनम्वख चुय ॥० ॥

पार्वती हुन्दि नाथु हरु हरु शंकरु,
 हरु थव मन्ज़ूर ज़ारु पारु म्योन ।
 दर्शुन हावतम तु कासतम दुय ॥
 रोज़तम मे सातु सातु सनम्वख चुय ॥० ॥

डैकि छुय चॅन्द्रमु हटि छुय वासुक,
 छुख सर्व व्यापक वॅलिथ मृगुछाल,
 स्यद करान साधना बॅखत्यन हुंज़ुय ॥
 रोज़तम मे सातु सातु सनम्वख चुय ॥० ॥

टाठि ग्वसाने मंज़ मनि म्याने,
 म्याने गछि कुठि करतु सॉ वास ।
 दास छुस प्रारान व्यन्ती करान बुय ॥
 रोज़तम मे सातु सातु सनम्वख चुय ॥० ॥

डमरू वायान चुय त्रिशुलदोरी,
 खोरी कासतम हरुम द्वख तु व्योज़।
 छुस पथर प्योमुत तुलखना मेथोद चुय ॥
 रोज़तम मे सातु सातु सनम्बख चुय ॥० ॥
 त्रिलोकी नाथ म्यानि 'विश्वासय',
 आसय च़ेय शरण पुशुरमय च़े पान।
 परमु शॉन्ती दिज्युम यूगु अभ्यासय ॥
 रोज़तम मे सातु सातु सनम्बख चुय ॥० ॥

दादन वातुम वादु मय मँशराव

दादन वातुम वादु मय मँशराव,
 मॉज भवॉन्य् दर्शुन मे हाव।
 कर दया दृष्टी कर्मु खुर अँज़राव ॥
 मॉज भवॉन्य् दर्शुन मे हाव ॥० ॥
 मोहँ ज़ालसु मंज़ बन्द छुस गोमुत,
 कन्द म्योन वेगल्योमुत।
 बावय बावुनायि यिनु करु हम ग्राम ॥
 मॉज भवॉन्य् दर्शुन मे हाव ॥० ॥
 स्वखक्यन खज़ानन ठानु चु मुचुरान,
 मेति सोज़ स्वखु भन्डार।
 छ्वख छुम लोगमुत बँलुराव आमुताव ॥
 मॉज भवॉन्य् दर्शुन मे हाव ॥० ॥

ग्रटचे कनि म्यानि छल कर ड्योल चुय,
 यिकुवटु पिश म्याँन्य् शूकु ठेलय ।
 द्वख दौद् म्याँन्य् मौज पानु बॅलराव ॥
 मौज भवौन्य् दर्शुन मे हाव ॥० ॥

फेरान पानु छुख सारिनुय जहानन,
 वाहन त्रे शेरि बबराह ।
 सानि थाव स्यद पीठ करतु मौज ठॅहराव ॥
 मौज भवौन्य् दर्शुन मे हाव ॥० ॥

पम्पोशि पादन तल रछुम पानय,
 र्वनि दामानय थव मे सायिबान ।
 'विश्वास' करय पूज अख रछाह कन थाव ॥
 मौज भवौन्य् दर्शुन मे हाव ॥० ॥

मे छु चॉनी सथ, रच हावुम वथ

मे छे चॉनी सथ रुच हावुम वथ,
 मे छु क्षण क्षण शिव नाथु चोन हाजथ ।
 ह्यथ शक्ती यि सौं सोन करुम मुर्दवथ ॥
 मे छु क्षण क्षण शिव नाथु चोन हाजथ ॥० ॥

शिव नाथु म्यानि भोले भण्डारी,
 हावुम सनम्बख दर्शुन त्रिशूल दौरी ।
 जेटि गंगा माता गंगा ह्यथ ॥
 मे छु क्षण क्षण शिव नाथु चोन हाजथ ॥० ॥

कौलासु प्यठु व्वलु सोन कर प्रस्थान,
 चोन दर्शुन मे थदि थोद यज़थ तु मान ।
 चेश्मु चानि छम मस खॉस्य छुख मस चथ ॥
 मे छु क्षणु क्षणु शिव नाथु चोन हाजथ ॥० ॥

वॉन्सु राव्य्म मे बस ज़न्म दॉरुच दॉरी,
 इष्टु म्याने वाल सॉ मे पापु बॉरी ।
 प्वन्य् कर्मय मे बॅडराव थावुम सन्य् च्यथ ॥
 मे छु क्षणु क्षणु शिव नाथु चोन हाजथ ॥० ॥

छुख चु व्यापक हनि हनि मनि वुछिहथ,
 परमु शिवु रुपु च़वा पॉरुच छुख व्यॉपिथ ।
 प्रारु कूत काल प्रारनस छम नु ह्यकथ ॥
 मे छु क्षणु क्षणु शिव नाथु चोन हाजथ ॥० ॥

शीनु पर्वत, कोहसार, चॉन्य् शालुमार,
 शिन्या शयि शुमशान चॉन्य् शोहजार ।
 नागु राजि छय नॉल्य् च़ेय खंड माल ह्यथ ॥
 मे छु क्षणु क्षणु शिव नाथु चोन हाजथ ॥० ॥

शक्ती हुन्दि शिवुनाथु म्यानि शिव नाथो,
 भैरव नाथु सदा सहायतस रोज़तो ।
 वटकीश्वरु चुय छुख वटक नाथ ह्यथ ॥
 मे छु क्षणु क्षणु शिव नाथु चोन हाजथ ॥० ॥

ज्योतिर्लिन्ग चुय हसॉ रॉमेश्वर,
 चुय 'विश्वास' म्योनुय परमेश्वर ।
 हाव मे दर्शुन सनम्वख यिम उमा ह्यथ ॥
 मे छु क्षणु क्षणु शिव नाथु चोन हाजथ ॥० ॥

मे ओनमय ऑलु बेयि नाबद चे डॉली

मे ओनमय ऑलु बेयि नाबद चे डॉली,
 बु आमुत डेडि तल चाने सवाली ।
 ह्यमय वर अज बु जाह नेरय नु खॉली ॥
 बु आमुत डेडि तल चाने सवाली ॥० ॥

खबर छम छय व्वमा सुतिन चे वुन्यक्यन,
 मुसुट छुय मन तवय नादन थवुम कन ।
 डेके चॅन्द्रम हटे वासुक चे नाली ॥
 बु आमुत डेडि तल चाने सवाली ॥० ॥

वॅलिथ मृगछाल महीशर छुख चु आसन,
 मॅलिथ बस्माह जटादॉरी चु आसन ।
 परमु शिवु सासु भास्कर गाश चु खॉली ॥
 बु आमुत डेडि तल चाने सवाली ॥० ॥

वसान गंगा जी चे जेटि मंज दारि दारे,
 छि प्रारान दर्शनस दीव वारि वारे ।
 त्रिशूल दॉरी कनन छी कनु वॉली ॥
 बु आमुत डेडि तल चाने सवाली ॥० ॥

चे सिवॉय बिहिथ हिमालु संज कूर,
 यिहय छम म्यॉन्य् मॉज कवु छुख ह्यवान दूर ।
 चे बेवायि नाग, नागु राजि नॉली ॥
 बु आमुत डेडि तल चाने सवाली ॥० ॥

शिवो हर रात्री हुंद हा अज्ज छु श्वब दान,
 मंगान युस यिय दिवान तस छुख चु वुन्य्क्यन ।
 करुम सोद्धवॉन्य सुंज हिश बॉश मे खॉली ॥
 बु आमुत डेडि तल चाने सवाली ॥० ॥

चु छुख 'विश्वास' जगतन छी ग्यवान ग्वन,
 दपान सरतलि बनावान शिवनाथ छुय स्वन ।
 मे दिम शॉन्ती हॅरी हर पनुन्य् डॉली ॥
 बु आमुत डेडि तल चाने सवाली ॥० ॥

श्लोक

नन्दे चतुर्भुजो रक्ता, चतुर वक्ता त्रिलोचनम् ।
 बीजं गर्भम् मंडं शीलम्, चिन्तयत् विन्ध्य नाशनम् ॥



श्री पार्वती प्रियम् पुत्रं, परमेश्वर सेवकम् ।
 भक्त रक्षात् कर्म चैव, त्वं वन्दे नन्द केश्वरः ॥



नन्दकीश्वर नाव शुबिदार चोनुय

नन्दकीश्वर नाव शूबिदार चोनुय,

डन्डुवत प्रनाम छुय म्योनुय च़ेय ।

स्यदु पीठ सुंबलु दर्बार चोनुय ॥

डन्डुवत प्रनाम छुय म्योनुय च़ेय ॥० ॥

बॅखत्यन हुन्द छुख लालु बोड रक्षिपाल,

बालु लीला हावान छुख बे मिसाल ।

विज़ि विज़ि करुहोय पोशि वर्शोनुय ॥

डन्डुवत प्रनाम छुय म्योनुय च़ेय ॥० ॥

राज़ु सानि बॅखत्यन बोज़ साँ ज़ॉरी,

पम्पोशि पादन लगोय पॉरी च़ेय ।

कुस ना आसि येम्यु नु बजर चोन ज़ोनुय ॥

डन्डुवत प्रनाम छुय म्योनुय च़ेय ॥० ॥

सत्याखग, दापर खग, त्रित्या खग,

कलियखग ह्यथ यिम खगुय छि चॉनी

च़वशवुन्यु खगन मंज़ राज छुय चोनुय ॥

डन्डुवत प्रनाम छुय म्योनुय च़ेय ॥० ॥

वेगनु र्हता छुख येमि संसारी,

मुन्नराव तॉरी यलु थाव दार ।

बृशबुरुपु छुय शिवस वाहन चोनुय ॥

डन्डुवत प्रनाम छुय म्योनुय च़ेय ॥० ॥

माता शक्ती हुन्द छुख संतान,
शिव नाथस सुत्यु छुय चोन घ्यान ।
रॉछ बॅखत्यन् करुन्य् छु कर्तव्य चोनुय ॥
डन्डुवत प्रनाम छुय म्योनुय च़ेय ॥० ॥

ज़ेठुच अमावॅसी बेयि ब्रसवार,
नक्षत्र रोहन स्यठाह शूबिदार ।
ज़न्मुद्यन् मनावान य्वहय छुय चोनुय ॥
डन्डुवत प्रनाम छुय म्योनुय च़ेय ॥० ॥

कश्मीरु मंडु लुक्क्य ब्रह्मन सॉरी,
छी संसॉरी चॉन्य् सीवक ।
सौद्य् वॉन्य् सुन्द्य् पॉठ्य कर व्वपाय सोनुय ॥
डन्डुवत प्रनाम छुय म्योनुय च़ेय ॥० ॥

‘विश्वासु’ सान छुसय न्यथ चुय याद करान,
मनु मंदरस अेदर च़ेय पूज़ान ।
सथ छम बॅड चॉन्य् दास छुस चोनुय ॥
डन्डुवत प्रनाम छुय म्योनुय च़ेय ॥० ॥

वनु वनु पय चोन ब्रारि आंगॉनी

वनु वनु पय चोन ब्रारि आंगॉनी,
च़े शरन छी व्वमा भवॉणी यॉय ।
आशि तोशि सुंज़ छखय चुय महॉरानी ॥
च़े शरन छी व्वमा भवॉणी यॉय ॥० ॥

जल रूपी छुय येत्य् चोन आसन,
सनम्बख छख बिहिथ पदमस प्यठ ।

चुय शेरस सवार गाह त्रावॉनी ।।

चै शरन छी व्वमा भवॉणी यॉय ।।० ।।

वनुचन विगन्यून चॉन्य् छय माये,

स्वंदर वनस मंज चॉनी जाय ।

स्वखुदायक छख द्वख चु हरॉनी ।।

चै शरन छी व्वमा भवॉणी यॉय ।।० ।।

सासु बॅद्य नाव चॉन्य् सासु बॅद्य रुफ,

रुत्यन कारणन कुन प्रजलान ज्यूत्य ।

शिवस चुय शक्ती चुय नारायॉनी ।।

चै शरन छी व्वमा भवॉणी यॉय ।।० ।।

डयकु टिकु लॉगिथ ताज ह्यथ शूबान,

डय्कु चोन सास सिरियि गाह त्रावान ।

सासु बॅद्य मास्कर रुप प्रजलॉनी ।।

चै शरन छी व्वमा भवॉणी यॉय ।।० ।।

त्रन बवनन हुंज छय हुकुमरॉनी,

कारण त्रेशवय खास चॉनी छी ।

जाला रुप छख चु शोल मारॉनी ।

चै शरन छी व्वमा भवॉणी यॉय ।।० ।।

मायि हॅच जाय अख मंज गोम चॉनी,

सादन संतन छे चॉनी पुछ ।

पर्बतु तुलुमुलि सनम्बख यिवानी ।।

चै शरन छी व्वमा भवॉणी यॉय ।।० ।।

ब्रह्मा, विष्णु ह्यथ सूर मोत यॉय,
 सुत्य् माये चॉन्य् पूजाह करान ।
 कालिका रुप छख दुत गालॉनी ॥
 चै शरन छी व्वमा भवॉणी यॉय ॥० ॥

प्रंग चैय क्युत छुय लोलु हृदय म्योनुय,
 र्वनि दामानस तल दितम जाय ।
 मूक्ष दायक छख मूक्ष बखशांनी ॥
 चै शरन छी व्वमा भवॉणी यॉय ॥० ॥

गारी युस चै मॉज लोलु तु माये,
 छख करान तस पनुन साये मॉज ।
 मे ति नाय कांह गम रॉछ छम चॉनी ॥
 चै शरन छी व्वमा भवॉणी यॉय ॥० ॥

शुर्य सुन्द ज़ारु पारु मॉज छे बोज़ॉनी,
 गलती शुर्यन हुंज मॉज बखशान,
 रुत रुत शुर्यन क्युत मॉज कांछॉनी ॥
 चै शरन छी व्वमा भवॉणी यॉय ॥० ॥

ही भवॉन्य् बोज़तम रोज़तम मेहरबान,
 'विश्वास' छुसय मंगान बॅखती दान ।
 क्षण क्षण रोज़ नाव चोन स्मरॉनी ॥
 चै शरन छी व्वमा भवॉणी यॉय ॥० ॥

शिवु संजि मायि पख येमि कायाये

शिवु संजि मायि पख येमि कायाये,

यावन राये मंज मनि ज्ञान ।

वनि कड स्वनु कान लबख यछाये ॥

यावन राये मंज मनि ज्ञान ॥० ॥

स्मरणि गॅन्जराव नाव तॅम्यसुंद,

लछि नोव वनि येय छुख येम्य सुंद ।

ल्वति चोन गोब बोर छुनु परवाये ॥

यावन राये मंज मनि ज्ञान ॥० ॥

नारु क्वंड वुहुवुन मंज जिगरस,

छयतु कर सूहम शब्दय बस ।

अमरयतु नाग वुजि नारुचे जाये ॥

यावन राये मंज मनि ज्ञान ॥० ॥

सासु नावु शक्ती तस बस लीन छय,

बॅखत्य्न् स्व कासान द्वख संकट ।

क्षणु क्षणु थावान स्वय असि साये ॥

यावन राये मंज मनि ज्ञान ॥० ॥

हरम्बखु हरु हरु ज्ञान स्वय पानय,

ध्यान दारनाये तॅहन्जि प्राव कल्याण ।

दूर छुय नु निशि छुय मंज कायाये ॥

यावन राये मंज मनि ज्ञान ॥० ॥

छेनु जुदा शक्ती निशि भगवानस,
 आदि शक्ती शंकर छुस नाव ।
 दारनायि घ्यानु च कैलाश जाये ॥
 यावन राये मंज्र मनि ज्ञान ॥० ॥

ज्जारु पारु म्योन तस वॅन्युतव सन्तव,
 सनु छुम लबुखय बवसुरु तार ।
 'विश्वास' त्रैयि तरि शिव दारनाये ॥
 यावन राये मंज्र मनि ज्ञान ॥० ॥

कर्मक बार

योरु आख तोरु ह्यथ कर्मक्यु बॅरी,
 सॉर्य सॉर्य लोचराव म्वकलाव पान ।
 हा बॅखति डखि ज्ञान न्यथ पनुन भगवान ॥
 सॉर्य सॉर्य लोचराव म्वकलाव पान ॥० ॥
 लय थाव सादन संतन व्यचॅरी,
 यॉरी करुवुन छु कुन यज्ञदान ।
 तॅस्यु लागु तनु मनु पोश चॉर्य चॅरी ॥
 सॉर्य सॉर्य लोचराव म्वकलाव पान ॥० ॥

अकि ज़ुचि नबुचे तारख मालय,
 छयनु यिनु सुत्यु आख येत्यु जन्मस ।
 म्वकलख नखु वाल पापु शापु बॅरी ॥
 सॉर्य सॉर्य लोचराव म्वकलाव पान ॥० ॥

सूर मौल कुत्यव संतोषि ब्याले,
 सूर छेवुख तनि प्रोवुख नूर ।
 कनि कौर्य कौर्य चोख पोन्य् फयॉर्य फ्यॉरी ॥
 सौर्य सौर्य लोचराव म्वकलाव पान ॥० ॥

पांचन पांडुवन मंज बनेयि यॉरी,
 राजि युधिष्ठिर ओस धर्म अवतार ॥
 पांछ त्वत पान ह्यथ चाव वयक्वठु दॉरी ॥
 सौर्य सौर्य लोचराव म्वकलाव पान ॥० ॥

ज्योन मरुन युन गछुन पकुवुन दॅर्य याव,
 छ्यन लबि सुय युस प्रावि शिवदाम ।
 अतु गतु अदु तस ज़ांह छेनु वॉरी ॥
 सौर्य सौर्य लोचराव म्वकलाव पान ॥० ॥

वीदन हुंद साज़ गीता जी पानय,
 गीतायि हुंद सार छु कुन ओकार ।
 सुय बॅनिथ आमुत राम, कृष्ण, कलंक अवतॉरी ॥
 सौर्य सौर्य लोचराव म्वकलाव पान ॥० ॥

हर कॉन्सि हुन्दि दॅस्य् क्यथु गछि बावथ,
 सुय करि यस थावि दय सन्य् च्यथ ।
 सरस्वती मातायि हुंज बन्य्स यॉरी ॥
 सौर्य सौर्य लोचराव म्वकलाव पान ॥० ॥

विश्वासु सान दार ध्यानु ओंकार,
 छुय व्यछुनॉविथ वीदन सार ।
 ॐ ॐ ॐ ज़पान कर ओमुच गिलकॉरी ॥
 सौर्य सौर्य लोचराव म्वकलाव पान ॥० ॥

लोलस चॉनिस लोल बरय

लोलस चॉनिस लोल बरय,

पूज हो करय पूजा करय ।

दर्शुन मे दिम ग्वडु अदु मरय ॥

पूज हो करय पूजा करय ॥० ॥

शिव नाथु गवरी शंकरय,

दूरयर ति वन कति चोन ज़रय ।

तारु हॉम मे पानय बवुसरय ॥

पूज हो करय पूजा करय ॥० ॥

शक्ती हुंदि सरताजे,

जयजयकार ज़गुतुचि माजे ।

गणपत, कुमार, नन्द की श्वरय ॥

पूज हो करय पूजा करय ॥० ॥

जय जय कार माजि मीनावॅती,

ज़ामुन्न यस निशि पानय सती ।

आहस वरनि तस चु ईशरय ॥

पूज हो करय पूजा करय ॥० ॥

जटि चानि छि गंगा जी बसान,

अमि श्रानु पॉप्प्यन पाप हरान ।

डेकि छुय चे चॅन्द्रम ख्वश तरय ॥

पूज हो करय पूजा करय ॥० ॥

गायत्रे चै छय नॉल्य नाग राज,
 बैखत्यन दिवान मुक्ती चु दाज ।
 हर शायि चु व्यापक हॅरी हरय ॥
 पूज हो करय पूजा करय ॥०॥

अखंड ब्रह्मांड छुख पान चुय,
 शक्ती पैमुत्र चॉन्य सागरय ।
 ब्रह्मा, विष्णु, महीशरय ॥
 पूज हो करय पूजा करय ॥०॥

त्रैयलूकी नाथ छी चै वनान,
 नीलु कंठ विश पान छुख करान ।
 'विश्वास' छुम मै दिख तार बवुसरय ॥
 पूज हो करय पूजा करय ॥०॥

ब्रम ज्ञान संसार

ब्रम ज्ञान संसार वक मु कर जाये,
 माये लारुस छारुन यार ।
 कर अम्बारु पोशन लागुस पूजाये ॥
 माये लारुस छारुन यार ॥०॥

मनुकिस सॅदरस मो मार ग्राये,
 शमु दमु जाग ह्यथ रोजुस तल ।
 वॉरागु वान्ति वस सनिरुचि जाये ॥
 माये लारुस छारुन यार ॥०॥

शोमरिथ मन रूजिथ रुचि शाये,
गटि मंज अदु वुछख प्रजलान नूर ।
म्वलु रोस द्वरुलब कर्म बावनाये ॥
माये लारुस छारुन यार ॥०॥

अपजुय सोरुय छय कमिच माये,
यार दोस बाँय बंद सॉरी अयार ।
प्रजुनाव पान पनुन येमि कायाये ॥
माये लारुस छारुन यार ॥०॥

सग धू बूमिकायि गोंगलचि त्राये,
बैठ्य बेर हमवार करुस यकबार ।
कनि काठ त्रॉविथ छुन बे वाये ॥
माये लारुस छारुन यार ॥०॥

थख दिथ वक मा गछि चोन ज़ाये,
वाप सूरिथ रटि ब्योल जंगार ।
गुश्मस कति चालि तापुच क्राये ॥
माये लारुस छारुन यार ॥०॥

हर्दुन्य ज़र्दी फीर प्रथ शाये,
कम कम गुलशन छि सपदान वुजार ।
रुचि मैचि ब्योल वव लोन फल बेवाये ॥
माये लारुस छारुन यार ॥०॥

फल थाव रँछरिथ दल दिथ माये,
विजि विजि करुहॉस अदु आहार ।
फाकु फरि वातखनु मँजिलुचि जाये ॥
माये लारुस छारुन यार ॥०॥

कौल जान कोसतूर श्रावुनुचि राये,
 यियि करि बोल बोश तस छु 'विश्वास' ।
 त्रैयि परि हरि ॐ त्रावि कायाये ॥
 माये लारुस छारुन यार ॥०॥

शारिकॉय नावस लगय पॉर्य पॉरी

शारिकॉय नावस लगय पॉर्य पॉरी,
 हॉरी पर्वतुच बोजुम जॉरी ।
 जगि छख कासान मोह अंधकॉरी ॥
 हॉरी पर्वतुच बोजुम जॉरी ॥०॥

त्रेय वनान नारायेणी, त्रेय भेंद्रु कॉली,
 चु त्रिपूर स्वन्दरी, चुय लॅक्ष्मी ।
 शिवु संज्य् शक्ती जगत छुय पुजॉरी ॥
 हॉरी पर्वतुच बोजुम जॉरी ॥०॥

चंड मंड राक्षसन छख सम्हॉरी,
 बॅखत्यन किच कोमल, तु ऑरी ।
 दीवन अमरयथ दितुथ सॉर्य सॉरी ॥
 हॉरी पर्वतुच बोजुम जॉरी ॥०॥

चरण चॉन्य् कोमल पम्पोशि वेंथुर ज़न,
 बॅखत्यन मंज हृदयस शूबन ।
 यिन गछुनक्व् छिख बंद गछान तॉरी ॥
 हॉरी पर्वतुच बोजुम जॉरी ॥०॥

मायि हँत्य् छी बँखुत्य् यिवान दवान लारान,
 लोलु सान नाद लॉय लॉय च़ेय गारान ।
 कैह यिवान पॉदँल्य् छि कैह ननुवॉरी ।।
 हॉरी पबर्तुच बोज़ुम ज़ॉरी ।।० ।।

कैचन अथन क्यथ छिय पोषि दस्तय,
 कैह द्वद तु नाबद ह्यथ छि मस्तय ।
 सॉरी करान च़े पूज पोश च़ॉर्य च़ॉरी ।।
 हॉरी पबर्तुच बोज़ुम ज़ॉरी ।।० ।।

विश्वासु छिय यिवान च़ेय निश सॉरी,
 मायि सान बोज़ान छय तिहुंज ज़ॉरी ।
 सन्म्वख छख चु त्रैयस मॉज च़वापॉरी ।।
 हॉरी पबर्तुच बोज़ुम ज़ॉरी ।।० ।।

संतोष अमर्यथ

संतोष अमर्यथ संतोष सु पानय,
 तस शिव वनानय करुस पूजा ।
 बँखुत्य् सुय पँज बँखती दिवानय ।।
 तस शिव वनानय करुस पूजा ।।० ।।

ऊँ भूः भर्वःस्वः मन्त्ररुत क्याह,
 परि युस प्रैयमु सान लबि निर्वाण ।
 कुन ओस, कुन छुत कुन रोज़ि पानय ।।
 तस शिव वनानय करुस पूजा ।।० ।।

मूल ह्योर, लंजि ब्वन नव अस्मानय,
 सथ ज़मीनु हैरि ब्वनु रोज़ानय ।
 प्यठ छिस पर्वत, सास सिरिय नूरानय ॥
 तस शिव वनानय करुस पूजा ॥०॥

शीशि नागस प्यठ पम्पोश आसन,
 तँथ्य् प्यठ रूजिथ ह्यथ लँक्ष्मी जी ।
 कालासस प्यठ ह्यथ शक्ती पानय ॥
 तस शिव वनानय करुस पूजा ॥०॥

जैटि छस गंगाजी स्वर्गु वसानय,
 डेकि छुस चँन्द्रम ताबानय ।
 हटि छुख वासुक बोसु दिवानय ॥
 तस शिव वनानय करुस पूजा ॥०॥

सुत्य् ह्यथ शक्ती घ्यान दारानय,
 शक्ती बँखत्यन छु थावानय ।
 सृष्टी पालक, सम्हार करानय ॥
 तस शिव वनानय करुस पूजा ॥०॥

‘विश्वास’ बँखत्यन सु विश्वास पानय,
 च्य तु च्यन्तनु परान राम रामय ।
 साकार निर्कार ओमकार खु पानय ॥
 तस शिव वनानय करुस पूजा ॥०॥

वाख

आदि छुसनु ऊँ शम
 अन्त छुसनु ऊँ शम
 ऊँ शम हाल चुय ज्ञान
 ऊँ शमभूत, ऊँ शम भविष्य
 ऊँ शम अनतु रोस काल चुय ज्ञान



आकार कारनन युस छुय प्रजलान,
 तस छी वनान ला मकान ।
 कारणन त्रन हुंद येम्य ज्ञन म्युल ज्ञोन ॥
 ऊँ प्रज्ञनोवुन सुय छुय महान ॥



सुय फेरि लंजि लंजि येति पोशिबागन
 सुय बनि तति बागवान
 सुय नेरि रँहबर पनुनिस पानस
 जॉन्य् वॉल्य् सुंज लबी ज्ञान



सुय बनि हमसू, बनि सुय सूहम
 ज़िन्दु मरि रिंदु नेरि जान
 सुय लबि पय अदु तस जानानस
 यस आलमन मुज परमस्थान



सोंतुक सबज़ार हर्दच ज़र्दी
 युन तय बैयि गछुन ज़ान
 ज़्यनस छु मरुन लॉज़िमि मलज़ूम
 आवागमन अर्थ्य वनान



शालुमारन येति क्याह करि 'विश्वास'
 विश्वास प्यठ कॉयिम जहान
 मनु नागरादस येलि करी तस पूज़
 अदु प्रावि न्यरग्वणस लबी न्यर्वान



आदि छुसनु ऊँ शम
 अन्त छुसनु ऊँ शम
 ऊँ शम हाल चुय ज़ान
 ऊँ शम भूत काल
 ऊँ शम भविष्यत
 ऊँ शम अन्तु रोस
 काल चुय ज़ान



मे ओनमख लोलु सालय

मे ओनमख लोलु सालय,	त्रि जगत पालु शम्भू ।
नॉल्य् त्रावय ब्यल मालय,	दीनु दयालु शम्भू ॥
मे ओसुम लोल आमुत,	गोमुत ओसुम दिलस होल ।
मे लौब मख कमि कशालय ॥	रोटमख नालु शम्भू ॥० ॥
यनु चोलुख चुय मे त्राँविथ,	चे रोस्तुय छम कंसुज आश ।
बु दूरयर चोन नो जालय ॥	म्यानि रक्षपालु शम्भू ॥० ॥
युस चॉन्य् करी पूजन,	तस छुनु जांह सोरन ।
अन्तस रुच स्मरण ॥	दिज्यम् कृपालु शम्भू ॥० ॥
कैलाश पर्वतनुय,	प्वन्य् किथय् कॅर्यमुत्य् छी ।
साधना स्यद करान चुय ॥	बॅखत्यन् दयालु शम्भू ॥० ॥
गोड दिमय अशिबाने,	पूजकरु श्रोत्रि श्राने ।
मीठ्य् दिमय कर्म लाने ॥	छुख बे मिसाल शम्भू ॥० ॥
नीलु कंठु लगय पादन,	गोश थवुम पॅर्ययादन ।
पानय मे वातुम दादन ॥	चुय शक्ति विशाल शम्भू ॥० ॥
त्रिलोकी नाथु म्याने,	लछि नोव छुख ग्वसोन ।

‘विश्वासु’ रोज़ साने ॥

दिम स्वख दयालु शम्भू ॥० ॥

बोल बोश करु जानानस सुत्य

मस चमु लोलय लोल मसवानस,
 बोल बोश करु जानानस सुत्य ।
 मनुके नागरादु वुजि वुजिन्यु मे पानस ॥
 बोल बोश करु जानानस सुत्य ॥० ॥

तस बरु मस प्यालु लोलु यियम सालय,
 सोजि शोछ कालय छुय मे सुत्यु युन ।
 सखरिथ रोजस आँनु जॉपानस ॥
 बोल बोश करु जानानस सुत्य ॥० ॥

रोशि रोशि पोशि थॅर तस करु अर्जी,
 मर्जी तॅम्यु संजुय छु म्योन अथवास ।
 सुत्यु सुत्यु रोजस्युम कहर जॉन्पानास ॥
 बोल बोश करु जानानस सुत्य ॥० ॥

नोन यिज्यम पान नूरि नूरानय,
 ज्योन मरुन युन गछुन सुय करुयम माफ ।
 गथ करान रोजस तथ नूरानस ॥
 बोल बोश करु जानानस सुत्य ॥० ॥

अखंड ब्रह्मांडस व्यापक पानय,
 सासु बॅद्यु भासकर छुस शुहुल तीज ।
 ओमकार स्वरूपस तस भगवानस ॥
 बोल बोश करु जानानस सुत्य ॥० ॥

‘विश्वास’ तैम्य सुंद छस खबर पानस,
तंदिस दोस्तानस कस छु संदेह ।
जाय तैम्य सुन्ज छम मंज मनि थानस ॥
बोल बोश करु जानानस सुत्य ॥० ॥

म्वरली दर म्योन छुख चु भगवान

म्वरली दर म्योन छुख चु भगवान,
क्षण क्षण मे गछ्यम चोनुय ध्यान ।
पूजाह बु करय बखति बावु सान ॥
क्षण क्षण मे गछ्यम चोनुय ध्यान ॥० ॥
बालु कृष्ण सोन यितु छालु मारान,
पनुने म्वखु दिम गीता ज्ञान ।
तार दिज्यम बवसरस दर्शनु सान ॥
क्षण क्षण मे गछ्यम चोनुय ध्यान ॥० ॥
असुवनि म्वखु छख मूक्ष दाता,
सीवायि चै लक्ष्मी जी जगत माता ।
सादन संतन लोलाह बरान ॥
क्षण क्षण मे गछ्यम चोनुय ध्यान ॥० ॥
चौतुर्बोज रुफ यस पानु हावख,
कल्पन हुंद न्याय अँजरावख ।
तैथ्य दर्शनुसय छुसय प्रारान ॥
क्षण क्षण मे गछ्यम चोनुय ध्यान ॥० ॥

मथरायि येलि ज़ाख पानु भगवान,
 वसुदीव साज़ु ओस ज़ेय पूज़ान ।
 कौंद खानु तस बन्यव स्वर्गस्थान ॥

क्षण क्षण मे गळ्यम चोनुय ध्यान ॥०॥

दीवकी मातायि निशि चुय ज़ाख,
 नन्दु गोरयुन गरु ज़ेविथुय ज़ाख ।
 जसुदा मातायि कति छे जानान ॥

क्षण क्षण मे गळ्यम चोनुय ध्यान ॥०॥

गोकल बिंद्राबनस बोरुथ लोलाह,
 गूपियन सुत्यु गिंजुथ रासु लीला ।
 काम दीनु रछुथ गूरुय बालकन सान ॥

क्षण क्षण मे गळ्यम चोनुय ध्यान ॥०॥

कौली नाग ओस ज़हर हारान,
 जमना जी ऑस तवय परेशान ।
 कँडिथुय तमि मंजु द्युतथस ज्ञान ॥

क्षण क्षण मे गळ्यम चोनुय ध्यान ॥०॥

कुरुक्षेत्रुक य्वद करुनोवुथ,
 टॉठिस अर्जनस ज्ञान बोवुथ ।
 गीता जी वॅन्यु थस व्यस्तारसान ॥

क्षण क्षण मे गळ्यम चोनुय ध्यान ॥०॥

च्वदाहँ वुहरुय द्राख मथरायि कुन,
 स्वर्गस ओसुय कंस सोज़ुन ।
 राक्षसन आख चुय नाशाह करान ॥

क्षण क्षण मे गळ्यम चोनुय ध्यान ॥०॥

त्रि भवन सारु मे ति हाव दर्शुन,
 'विश्वास' बु करय पोशि वर्शुन ।
 परमु शॉन्ती गछ्यम दिम मे वरदान ॥
 क्षणु क्षणु मे गछ्यम चोनुय ध्यान ॥०॥

आवहय गूव्यंद ज़न्मस साने

आवहय गूव्यंद ज़न्मस साने,
 गोड अशिवाने तस बु दिमस ।
 दर्शुन तसुंद छुम मे अज़लु लाने ॥
 आवहय गूव्यंद ज़न्मस साने ॥०॥

पम्पोशि पादन मीठ्य दिवान रोज़स,
 चामर बु करस अँछर वालव ।
 पोशि पूजा करस हमेशि रोज़ साने ॥
 आवहय गूव्यंद ज़न्मस साने ॥०॥

चौतुर्बोज़ रूपस विष्णो स्वरूपस,
 क्षणु क्षणु म्योन छुस साष्टांग प्रणाम ।
 ज्ञान ध्यान, बँखती क्वसु नु तस माने ॥
 आवहय गूव्यंद ज़न्मस साने ॥०॥

भगवान कृष्णस अँमिस थनि चूरस,
 यिहान्दि नूरु नूरान छि सथ संसार ।
 अँमी वँन्यु गीता जी य्वहय सार ज्ञाने ॥
 आवहय गूव्यंद ज़न्मस साने ॥०॥

भगवान लगयो पम्पोशि पादन,
 म्यान्यन नादन थाव तम गोश ।
 भाग्य म्योन डोलमुत शेरुम अज़ लु लाने ॥
 आवहय गूव्यंद ज़न्मस साने ॥० ॥

‘विश्वास’ पोज़ छुम चोनुय विश्वास,
 विश्वास म्योन करतु पूरण चुय ।
 थनि दूर ख्यावुहथ यितु ख्यतु साने ॥
 आवहय गूव्यंद ज़न्मस साने ॥० ॥

वाख

ऑव्युल कॅतिथ कॉन्सि मा दौयुम
 लमान लमान लोसी मा दोह
 मॅन्ज़िलाह कजोम पानुय थोकुम
 बोज़ व्वन्य् बाकुय हदु रौस कोह



चमनन पेरान गुलव पृछोम
 क़मन क़मन बॅनिथ आव
 हरदस ज़र्दी, शिशारस सर्दी
 सौंतस हसौ ख्वय शुहुल वाव



आदि रोस, मध्य रोस अन्तु रोस
सनिरस युस सोन आत्म दयि सुंद नाव
पनुने मनि युस वांति वसि सनिरस
बानीश्वर श्वर छानस स्वभाव



युस वसि सँदरस, लाल लबि ननिरस,
सुय गव भ्रम सुय सूहम भाव
यछ पछ करुन्य सनुन ओमस
ध्याँनी ज्ञाँनी पक्नुनावि नाव



अन्तस युस ज़पि पनुनिस ओमस
सुय गव यूगी मुक्ती भाव
यि कैह मे ल्यूखुम ती तँम्य् वॉनुम
खॉनिथ जिगरस तसुन्द नाव



त्राँविथ पथ खोरि सोरुय छुनुम
मनु मंदरस छुम शिव स्वभाव
त्रैयि छुय तोशान विश्वास कांछान
लोलस मे गुनिराव बखाती बाव



ॐ शब्द मिजराब छुम

डेडि म्याने गैबुकुय मेहराब छुम,

तारि अन्दरुय ॐ शब्द मिजराब छुम ।

तारि हुंद सोज यारु सुंद क्यमखाब छुम ॥

तारि अन्दरुय ॐ शब्द मिजराब छुम ॥० ॥

जुव यार म्योनुय जान म्योन जाना,

सुय छु साक्य, जान सुय, पयमानु म्योन ।

जानि जानान सुय मेहर, माहताब छुम ॥

तारि अन्दरुय ॐ शब्द मिजराब छुम ॥० ॥

तस कुनथ सरखम सदा रोजि म्योन,

सुय अवल सुय छु आँखुर अजलु लोन ।

हावि दर्शुन पोज करुवुन खाब छुम ॥

तारि अन्दरुय ॐ शब्द मिजराब छुम ॥० ॥

यस तसुंज योरी तस कति परु पेयस,

लोलु सँदरस मंज कुनी डुंगि अथि दुर यियस ॥

धनु द्वार सुय छुम सुय मे सवाल छुम ॥

तारि अन्दरुय ॐ शब्द मिजराब छुम ॥० ॥

जौहिदी मंज बे अदब मा कांह ति छुय,

आँबिदी मंज सौबित कदम कांह खाल छुय ।

मनि बँसीरत छम तसुंज आफताब छुम ॥

तारि अन्दरुय ॐ शब्द मिजराब छुम ॥० ॥

जुल्फे शाहमार यारसुय म्यॉनिय छि क्चाह,
 तॉरीफ करहॉस ज़ेवि त्यूत जुव छु मा ।
 चेश्मे नर्गिस नॉल्य् तस कुलमार छुम ॥
 तारि अन्दरुय ॐ शब्द मिज़राब छुम ॥० ॥

सूर मॅलिथुय सासु बदि सिरययुक नूर छुम,
 छुम बॅसिथ मनि मंज़ मे निश पोज़दूर छुम ।
 दूर रोज़ुन तस निशे वन्य् अज़ाब छुम ॥
 तारि अन्दरुय ॐ शब्द मिज़राब छुम ॥० ॥

साकारु सौरूपुय फेरुवुन डंडक वनस,
 न्यराकार सौरूपुय सुय छु व्यापक हर ज़रस ।
 सुय छु म्योन राम, कृष्ण सुय शिव नाथ छुम ॥
 तारि अन्दरुय ॐ शब्द मिज़राब छुम ॥० ॥

‘विश्वास’ बन्योमुत करताम यारस टोठ दास,
 परमु शिवस पादुनुय तल ब्वन्य् छु खास ।
 तव किन्य् अँसीरी तस दिव्रुन दर खाब छुम ॥
 तारि अन्दरुय ॐ शब्द मिज़राब छुम ॥० ॥

पोशि मालु

मे हसॉ अँन्य्मय च़ेय गुलाब डालि लोलो,
 बबु लगुयो मस्तानु चालि लोलो ।
 बबु लगुयो बो चानि चालि डालि लोलो ॥
 बबु लगुयो मस्तानु चालि लोलो ॥० ॥

भगवान गोपी नाथु म्योन चै जय जय कार,
 येति ग्रश्मस थॉव्यूज्यूम बोनि शोहजार ।
 युथनु अथु मंज गछय बेमार लोलो ॥
 बबु लगुयो मस्तानु चालि लोलो ॥० ॥

नूरु बॅरते डेकि छुय द्योक चॅन्द्रम,
 चैशु मस खॉस्यु बॅखत्युन जाम चावन ।
 ताज मलुमॅल्यु दस्तार चै शेरि लोलो ॥
 बबु लगुयो मस्तानु चालि लोलो ॥० ॥

याद छिम पादन हुंज श्रुवन्यु श्रुवन्यु खाव,
 दजुवन्यु दून्यु वुहनुक लोलु होत बाव ।
 ज्ञान ध्यान हथ चै बखती सवालि लोलो ॥
 बबु लगुयो मस्तानु चालि लोलो ॥० ॥

मेदि वरदान बुति युथ करु परवाज,
 हर कॉन्सि हुंघु छी अयान बबु चैय राज ।
 छुनु कांह न्यबर चानि ज़पु मालि लोलो ॥
 बबु लगुयो मस्तानु चालि लोलो ॥० ॥

शिव स्वरूपस म्योन छुय जय जय कार,
 नागु राजि छुय नॉर्यवन बोड चु ताजदार ।
 बोसु पादन दिवान पोशि मालु लोलो ॥
 बबु लगुयो मस्तानु चालि लोलो ॥० ॥

यस बॅखतिस चॉन्यु दृष्टी सु ख्वशहाल,
 चान्युन बॅखत्युन छुनु गछान खम मसवाल ।
 छी शेरान चै पकवानु थालि लोलो ॥
 बबु लगुयो मस्तानु चालि लोलो ॥० ॥

‘विश्वास’ चोन बॅखत्यून पोशि नावुख,
 क्षणु क्षणु लोलु नज़र पानु थावख ।
 दिम मे परमु शॉन्ती छुय त्रैयुन सवालु लोलो ॥० ॥
 बबु लगुयो मस्तानु चालि लोलो ॥० ॥

सु छु पानस सुतिन मेय

जान वंदस जानि जानानस
 सु छु पानस सुतिन मेय ।
 पूजाह कारस लोलु यज़ दानस ॥
 सु छु पानस सुतिन मेय ॥० ॥
 नूर बॅर्तिस तंदिस नूरानस,
 सूर मॅतिसुय लगु पादन ।
 जाय छम तसुन्ज़ मंज़ मनि थावस ।
 सु छु पानस सुतिन मेय ॥० ॥
 ब्रह्म स्वरूपस तस लामकानस,
 चन्द्रुक्य् छिस वॉल्य् कनुनय ।
 सथ समसार छिस शामियानस ॥
 सु छु पानस सुतिन मेय ॥० ॥
 ब्रह्मा, विष्णु, शिव नाथ पानय,
 परमु शिव रुप सुय निर्रकार ।
 डेडि नखु तस रोज़ु शिव दामस ॥
 सु छु पानस सुतिन मेय ॥० ॥

छुन जगत अख छि जगत काँत्याह,

प्रथ जगतस कुन छुय व्यापक ।

परम शक्ती छस नूरानस ॥

सु छु पानस सुतिन मेय ॥०॥

सुय म्योनुय ओंकार स्वरूप,

सुय म्योनुय हज तु हावस ।

सुय वोत प्रोत सुय हर जमानस ॥

सु छु पानस सुतिन मेय ॥०॥

पायि बोड म्योनुय सु छु हर जाये,

सुय थावान बखत्यून साये ।

सासु बेंद् सिरुययि तस छि नूरानस ॥

सु छु पानस सुतिन मेय ॥०॥

आयि शारदा दोपनम पानय,

‘विश्वास’ लेख छुख अख बहानय ।

चानि त्वतायि छि टाछि भगवानस ॥

सु छु पानस सुतिन मेय ॥०॥

वानय वानय मतु नचतो

पानो पखतो बबु सुन्दि ज्ञानय,

वानय वानय मतु नचतो ।

छुय मा जाँह प्योमुत काँह अबख छानय ॥

वानय वानय मतु नचतो ॥०॥

दारि बर त्रौपरिथ याद करतन दय,
 वादु ह्यस सनम्बख दियि दर्शुन ।
 करि माता सहित रक्षा पौन्य पानय ॥
 वानय वानय मतु नचतो ॥० ॥

अज्ञान जालुन दोनि मंज चु ती वन,
 जालुन काम कूध मोहँ अंघकार ।
 ती व्यछुनावान गीता जी ज्ञानय ॥
 वानय वानय मतु नचतो ॥० ॥

शाहुमौर्य जुल्फन तन्दिनुय सनतो,
 नौल्य छुस वासुक डेकि चेंद्रम ।
 जेटि छस गंगा जी अर्शि वसानस्य ॥
 वानय वानय मतु नचतो ॥० ॥

गार्यस युस तस नखु पानय वातान,
 करनावान छुख साक्षात्कार ।
 सुय ओंकार रोज़तो पूजानय ॥
 वानय वानय मतु नचतो ॥० ॥

सुय छुय ब्रह्मा सुय छुय विष्णो,
 सुय छुय शक्ती हुंद भण्डार ।
 ओंकारुक रोज़ ध्यान दारानय ॥
 वानय वानय मतु नचतो ॥० ॥

स्मरणि हुंद दान बबु सुंद ग्वणु गान,
 माल छय मन्ज मनि गँजरान रोज़ ।
 आदनुक यस स्रुत्य छुम यारानय ॥
 वानय वानय मतु नचतो ॥० ॥

मनि मंज छुम बैसिथ छुन दूर ज़रय,
 लरि मंज म्याने बब विराजमान ।
 ज्ञानुच दूदु बब चाव्यम बब पानय ॥
 वानय वानय मतु नचतो ॥० ॥

भाव थाव चावसान चेर मु क ।
 वक छु कम द्वार सुय परमु ग्वर ।
 पम्पोशि पादन तस रोज़ न्यमानय ॥
 वानय वानय मतु नचतो ॥० ॥

तस बबस म्याँनिस कॉन्सि छुन वोनमुत,
 पानस द्युतनम तँम्य 'विश्वास' ।
 तन्दिस विश्वासस ग्वड रोज़ु बरानय ॥
 वानय वानय मतु नचतो ॥० ॥

श्रु गणेशस ज़ोरी

नियमित डंडवत प्रणामस आदि दीवस,
 दिमस अशिवानि गोड तस पानु शिवस ॥

करस प्रक्रम प्यमस पादन दिमस मीठय् ।
 दियम अमर्यथ छलस पाद बनि वुम्बुर मीठ ॥

बु ख्यावथ लेंड़य, तँहर, यँच श्रोचि श्राने ।
 लगय च़ेय आदि दीवो यिम सालु साने ॥

च़े छय द्रुय म्याँन्य् च़ु अँन्य् ज़्यन मॉज सरस्वती सुत्य ।
 च़े छय म्याँन्य् द्रुय च़ु अँन्य् ज़्यन मॉज लँक्ष्मी सुत्य ॥

कैरिव प्रकाशमान असि ज्ञानु प्रकाशि सुतिन ।

दियिव स्वख सम्पती पजि लोलु सुतिन ।।

बु ज़ोरी छुसय करान थव गोश मे पानय ।

मे बखशुम ज्ञान दानु बैखती खजानय ।।

मे छुम 'विश्वास' चोनी सथ मे पतु वथ ।

त्रिलोकी डेडि प्यठ छुस हावुम सतुच वथ ।।

जगत जननी माता शक्ती

न छुम ग्वरु शब्द नय ग्वरु पोर्य ज्ञानाह ।

मे वोतुम तस ति छारान अख जमानाह ।।

मे मा छिम वीद पेर्यमुत्य नय मे गीता ।

मगर छम मंज शिलस अख जगत माता ।।

चरण पम्पोश छिम अँम्य सुंघ स्यठाह टाँठ्य ।

करस चाम छलस अशिवानि पँज्य पाँठय ।।

हृदय कोमल असुन्द बैखत्यन छु रछिवुन ।

छुनो जांह कूघ अँमिस, म्वख हरसातु असु वुन ।

फव्रलान गुल पानु अँहन्जे नजरि सुतिन ।

करान कैल्य बोल बोश अँहन्जी दृष्टि सुतिन ।।

दैरिथ घरती तु आकाश छी तोतामथ ।

थव्यख मँहफूज माता पजि यवतामथ ।।

करान प्रक्रम अँमिस माजे छि सौरी ।

परान लीलायि करान पूजाह च्वपौरी ।।

छु जय जय कार ग्रजान हर शायि माजे ।
 वजान छिस साजु संतूर डोल बाजे ।।
 मुकटदौरी सवौरी टोठ शेराह ।
 छेत्र अनमूल रँत्नन हुंद छु सेहरा ।।
 ब्रह्मा विष्णो मँहीशर ज्ञाति ईशर ।
 यिहुज सरदार छे पानय सीरतश्वर ।।
 कुनी शक्ती मगर छिस सासु बँद् नाव ।
 छि दौरिथ सासु बँद् रुफ पोज कुनय भाव ।।
 शरण माता छुसय आमुत सदा च़ेय ।
 वरुम पम्पोशि पादन तल शुर ज़ॉनिथन मेय ।।
 मे बावतम सथ कथ चुय ग्वर बँनिथ व्वन्य् ।
 दितम शब्दा पनुन मॉज करतम दया नँन्य् ।।
 चु छख ऑंकार त्रै कारण चॉन्य् छी ग्वण ।
 त्रिलोकी छख करान राज सरतलि करुम स्वन ।।

परम शिवस कुन

मे द्युत वरदान परम शक्ती दोपनम व्यछुनाव ।
 ग्यवुख ग्वण शिव सुंज स्मरण करुस नाव ।।
 यि स्मरण युस परी तँहन्जि लोलु माये ।
 तँमिस किच शिव लूकस मंज छे जाये ।।
 तवय केंचन बंदन मंज गँयि यि वर्णन ।
 परुन ज़ेवि तय स्वरुन शिव नाव तनमन ।।

जुदा शक्ती छे नो शिवस निशे ज़ांह ।
 मुदा शिवय छु शक्ती विष्णु ब्रह्मा ।।
 शिवय वासुक शिवय छुय शीशिनाग सोन ।
 शिवय पानय त्रिभवनन नावपु किन्य नोन ।।
 शिवय ओंकार, शिवय वीदन हुंदुय सार ।
 पनुन ततसत पनुन श्री कृष्ण अवतार ।।
 शिवय आकाश, शिवय पृथ्वी तु पाताल ।
 शिवस छुन आदि, मध्यस शिव छु अन्त रोस ।।
 शिवय संसार शिवय गरुबार दर्बार ।
 शिवय व्यवहार, शिवय हरशायि सरकार ।।
 शिवय वुछिवुन अँछन हुंद गाश मानोन ।
 शिवस ताकत छु बोलान प्राण ज़ानोन ।।
 जुदा शिवस निशे येलि छय गछान तन ।
 प्यवान बलुवीर छि पथरिस ज़ायि सपदन ।।
 फकत कर्मय छु शिवस सुत्य लीन रोज़ान ।
 शिवय शंकर, सदा शिव परमु शिव मान ।।
 छु च्वशवय ग्रवग सु पानय, शिव पानय कल्प ज़ान ।
 शिवय आदार शिवय रक्षपाल शिवय ज़ान ।।
 शिवय बब मॉज लॉगिथ ज़गि पालान ।
 छु व्यापक सॉरिसुय कुन शिव छु आसान ।।
 शिवस स्मरण करुन छुय क्षण क्षण जान ।
 सयु छुन दूर मंज छु हृदयस ज़ान तयमान ।।
 करुम डंडवत प्रणाम तँस्य लीन सपदुस ।
 'त्रिलोकी नाथस' शिवस ओदीन सपदुस ।।

ज़ोरु ज़ोरु परयाँय दुर्गा जय

ॐ नमो भगवते मनु किन्य स्वरुयाँय,

ज़ोरु ज़ोरु परयाँय दुर्गा जय ।

ज़ोरु ज़ोरु परयाँय बैखति बावु परयाँय ॥

ज़ोरु ज़ोरु परयाँय दुर्गा जय ॥०॥

मनुक्यन बागन पोश सौबरॉविथ,

आसन करु ज़गत ज़ननी क्युत ।

राज करान ज़गतन स्वय पनुनि पानु छय ॥

ज़ोरु ज़ोरु परयाँय दुर्गा जय

वतुनय चान्यन तोसु वथुरॉयाँय,

वाखन चान्यन रछि करॉयाँय ।

रवनि दामानस जालारु गरुयाँय ॥

ज़ोरु ज़ोरु परयाँय दुर्गा जय ॥०॥

पम्पोशि पादन बोसु करॉयाँय,

ग्वरु म्वखु छलुयाँय चरणु कमल ।

मनु मंजलिस च़ेय गूरु गूरु करुयाँय ॥

ज़ोरु ज़ोरु परयाँय दुर्गा जय ॥०॥

ध्यान दारनायि आवाहन करुयाँय,

ह्यथ शिवनाथ छख यिमी सालु चुय ।

खिर तय द्वदु दूर्य च़ेय कित्य बरुयाँय ॥

ज़ोरु ज़ोरु परयाँय दुर्गा जय ॥०॥

जून पछि आँठुम ब्रत चोन दरयाँय,
मनु पूजा चाँन्य रोज़ करु वोन ।
चानि नामु स्मरणि बवुसरु तरयाँय ॥
जोरु जोरु परयाँय दुर्गा जय ॥० ॥

येति येति थानु चोन तोत तोत यिमुयाँय,
पोज़ माँज मे चु छख मनुसुय मंज़ ।
डंडुवत प्रणाम च़ेय च़ामर करुयाँय ॥
जोरु जोरु परयाँय दुर्गा जय ॥० ॥

‘विश्वास’ चुय थँज़ चुय त्रियलूकी,
सासु बँद्व भासकर चुय ज्योती ।
ओंकारु स्वरूपस च़े पूजा करुयाँय ॥
जोरु जोरु परयाँय दुर्गा जय ॥० ॥

बु हसॉ ललुनावन मंज़लिस मंज़

गूव्यंद छु म्यानि गरि बु सु सुलुनावन,
बु हसॉ ललुनावन मंज़लिस मंज़ ।
गूर गूर बु करस ज़ांह नसॉ त्रावन ॥
बु हसॉ ललुनावन मंज़लिस मंज़ ॥० ॥

मँस्ती अँम्य सुंजुय हौस बंद थावन,
चावन तु ख्यावन द्वद तु थनि दूरय ।
वावु हालि थोप दिथ सुय बु गँज़रावन ॥
बु हसॉ ललुनावन मंज़लिस मंज़ ॥० ॥

सु ति कुन बु ति कुन कुनि नसॉ त्रावन,

दोगन्यार दूर गछि बनि यकसान ।

लोल छुम लोलस लोल बरनावन ॥

बु हसॉ ललुनावन मंजलिस मंज ॥० ॥

च्यतु च्यन्तन सुय ऑनु बुथ थावन,

व्यूर तुलु पानस थावु बानस ।

बरु कॉल्य गछि पोश व्यूर ह्यथ थावन ॥

बु हसॉ ललुनावन मंजलिस मंज ॥० ॥

ज्ञानु ध्यानु तॅम्य सुंदी गरु येलि त्रावन,

सुत्य पकुनावन योत गछि तोत ।

क्षण क्षणु सूहम शब्द बोझुनावन ॥

बु हसॉ ललुनावन मंजलिस मंज ॥० ॥

वुफ तुलि 'विश्वास' खसि ज़ाँपानस,

छुस गॅनिथ लोल भगवानस सुत्य ।

स्वर्गुचि विगिने तस वनुनावन ।†

बु हसॉ ललुनावन मंजलिस मंज ॥० ॥

जानि जानानय हावि दर्शुन

साथ गव साथुय साथबनि पानय,

जानि जानानय हावि दर्शुन ।

पोशि फोत्य थवु तयार करस पोशि वरुन ॥

जानि जानानय हावि दर्शुन ॥० ॥

येति प्यठ अर्जी तस चानि वाचय,
तिमु परम शिवन वुछि पानय ।
कर छवपु तामथ वन मु ननि वानय ॥
जानि जानानय हावि दर्शुन ॥०॥

कूत आख प्रारान व्वन्य प्रार बेयि हना,
दारनायि रोजुस दारान ध्यान ।
अकसमात कनव बोज़ गछेन कनुवानय ॥
जानि जानानय हावि दर्शुन ॥०॥

छवपु करहोख पोज़ छवपु छय रवपु सुंज,
वुज्जवुन नागराद चोन स्वनु सुंद ।
तैथ्य मंज छारुन कुत्य छिनु सु छु कुन ॥
जानि जानानय हावि दर्शुन ॥०॥

ओंकुय रुफुय प्रज़लान हर सू,
सासु बँदी सिरियि छुस शुहुल तीज़ ।
ओंसुय पूज़ कर बन ॐ पानय ॥
जानि जानानय हावि दर्शुन ॥०॥

अँदरयुम दुफ ज़ाल ज़ानु ध्यानु जोते,
बँखती करी चॉन्य सखती दूर ।
कोह छुनु खनुनुय ख्वश रोज़ ब्रोंह कुन ॥
जानि जानानय हावि दर्शुन ॥०॥

साक्षातकार बनि ननिवानु यियि दय,
लोलुके सँदरय मंज़ु खसी सुय ।
लोलस चॉनिस सु ति लोल बरुवुन ॥
जानि जानानय हावि दर्शुन ॥०॥

यछ पछ दें छय गॅर छय गनीमत,
 स्वय गॅर आसि दातु मूक्षी दाम ।
 अमरस अमरयथ कथ क्युत पतु चोन ॥
 जानि जानानय हावि दर्शुन ॥० ॥

‘विश्वास’ छु वनान विशवस चोनय,
 नूर मोत सूर मोत छुय म्योनय ।
 शक्ती शिवस मंज तस निश छेनु ब्योन ॥
 जानि जानानय हावि दर्शुन ॥० ॥

मोल म्योनय यूगीश्वर

पायि बोड चाव छायि गरु सोनुय,
 मोल म्योनय यूगीश्वर ।
 लोलु वंदुसय बु कॅबीलु क्रोनय ॥
 मोल म्योनय यूगीश्वर ॥० ॥

वॉल्य कनुनुय नॉल्य खंडु मालय,
 लालु सालय अज आव सोन ।
 हटि वासुक छुस नुन्दु बोनुय ॥
 मोल म्योनय यूगीश्वर ॥० ॥

ह्वथ शक्ती लोलु थाल शेरस,
 कति गॉरस रोजि कांह पय ।
 मंज मनि छुम लालु ललवोनय ॥
 मोल म्योनय यूगीश्वर ॥० ॥

नीलु कंठस प्रक्रम करसय,
 बाल मरुसय पादन तल ।
 मसु रोजस खॉस्य बरुवोनुय ॥
 मोल म्योनुय यूगीश्वर ॥० ॥

कति खोचस यमुकिस भयसुय,
 नखि डखि छुम शिव सुंद नाव ।
 शिव नाव ह्यनु काल डलुवोनुय ॥
 मोल म्योनुय यूगीश्वर ॥० ॥

जेटि गंगाजी मायि छस वसानय,
 वति लूकन वालान पाप ।
 शाप संताप पानु हरुवोनुय ॥
 मोल म्योनुय यूगीश्वर ॥० ॥

डेकि चॅन्द्रम छुस शोलु मारान,
 मे ति हाविहे श्वबु दर्शुन ।
 'विश्वासय' कॉल्य सखरोवुन ॥
 मोल म्योनुय यूगीश्वर ॥० ॥

कृष्ण दर्शुन हय करव (रँव्य तर्जस प्यठ)

सँम्यवी सँखियव रोव करव,

कृष्ण दर्शुन हय करव ।

नन्दु गोरयुन गरु तरव ॥

कृष्ण दर्शुन हय करव ॥०॥

भगवानन दोर अवतार,

भूमी आव वालुनि बार ।

जमनायि अँस्य अपोर तरव ॥

कृष्ण दर्शुन हय करव ॥०॥

तुल्यवि सुतिन पोशि फोट्य,

पूजि लागोस कारि पँत्य ।

भाव पोशि मालु करव ॥

कृष्ण दर्शुन हय करव ॥०॥

याद करि लायि असि नाद,

अँस्य गछोस बोजि फँरययाद ।

कृष्ण कृष्ण अँस्य परवू ॥

कृष्ण दर्शुन हय करव ॥०॥

मायि तँहंजि युस वोलनय,

जांह तस निश सु चोलनय ।

श्रु रामस पूज करव ॥

कृष्ण दर्शुन हय करव ॥०॥

वायि बंसॅरी तान सुय,
 दौनी छु दियि दान सुय ।
 रॅटय रॅटय अँस्य गरु बरव ॥
 कृष्ण दर्शुन हय करव ॥० ॥

थनि चूरस थॅन्य दिमोस,
 तॅथ्य मॅल्य अँस्य लोल ह्यमोस ।
 मस चमव तु मस खॉस्य बरव ॥
 कृष्ण दर्शुन हय करव ॥० ॥

ज़ोरु ज़ोरु लायोस नाद,
 भगवान छु बोज़ि फॅरययाद ।
 स्वख तु सावुयि गंज बरव ॥
 कृष्ण दर्शुन हय करव ॥० ॥

यादव क्वलुक दीपक,
 त्रिलूकी छु व्यापक ।
 'विश्वास' तस प्रणाम करव ॥
 कृष्ण दर्शुन हय करव ॥० ॥

पनने रंगु मे ति रंगुनावतम

रंगु मति लगुयो चॉनिस रंगुसुय,
 पनने रंगु मे ति रंगुनावतम ।
 रंगु वुनि क्षणु क्षणु सुत्य थावतम ॥
 पनने रंगु मे ति रंगुनावतम ॥० ॥

बालु बालु छांडुहथ छुमनु साम्रथ,
 मनु कॉलासु यिम दर्शुन दिथ ।
 बैखती छु म्यूठ रस पानय चावतम ॥
 पनने रंगु मे ति रंगुनावतम ॥० ॥

जेटि छय गंगा जी छुख नुन्दबोनुय,
 हटि छुय वासुक क्याह लूबबोनुय ।
 डैकि चंद्रमु शोहजार थावतम ॥
 पनने रंगु मे ति रंगुनावतम ॥० ॥

शक्ती म्यॉन्य मॉज छय मस बरुसय,
 अँहंदि नावु छि तरान भवसरुसुय ।
 करतम दया सत संगु थावतम ॥
 पनने रंगु मे ति रंगुनावतम ॥० ॥

माला ज़पनुय मँस्ती मंज़ छुख,
 तपु रेशिनय चुय वतु हावुख ।
 भावु करय पूजाह चाव हुरावतम ॥
 पनने रंगु मे ति रंगुनावतम ॥० ॥

नीलु कंठु नीलनाग छुय वॅलिथ हॅटिसुय,
 कनुनुय छी वॉल्य चंदनुकी ।
 नॅख्य डॅख्य चुय छिहम यिनु मॅशरावहम ॥
 पनने रंगु मे ति रंगुनावतम ॥० ॥

सूर छुय मॅलिथुय नूर छुय पशपान,
 चैश्मु छय पम्पोश चानि शूबान ।
 नूर बैरति सूरमति दर्शुन हावतम ॥
 पनने रंगु मे ति रंगुनावतम ॥० ॥

‘विश्वास’ भगवान बबु छुख म्योनुय,
कासतम गुहनुय चन्द्रमुसुय ।
त्रेयलूकी नाथु सनम्बख बासतम ॥
पनने रंगु मे ति रंगुनावतम ॥० ॥

बब हय आव बबु भगवान आव

बबु सुंदि आश्रम शान्त स्वभाव,
बब हय आव बबु भगवान आव ।
सनम्बख वछतो न सानि डेरु चाव ॥
बब हय आव बबु भगवान आव ॥० ॥

खोबां स्वरूपस डेकि क्वंगु टयोक् छुस,
नॉल्य पशमीन फयरन शेरि दस्तार छुस ।
हटि नागु योनि पादन रवनि खाव ॥
बब हय आव बबु भगवान आव ॥० ॥

डंडुवत प्रणामस अँस्य न्यमोस सॉरी,
बब करि यॉरी लगोस पॉरी ।
छुय बबस सॉनिस कोमल स्वभाव ॥
बब हय आव बबु भगवान आव ॥० ॥

गूपी नाथस अँमिस भगवानस,
गुल्य गँडिथ रोज़ुहोस ज़ारुपारस ।
टोठ हय बबस छुय बँखती भाव ॥
बब हय आव बबु भगवान आव ॥० ॥

पूजाह करुहोस दुफ दीप जॉलिथ,
पम्पोशि हार नॉल्य थवुहोस त्रॉविथ ।
पानय बब तारि भवु सॉन्य नाव ॥

बब हय आव बबु भगवान आव ॥० ॥

लोलु हॅत्य सॉरी करोस जॉरी,
द्वख कासि दूर करि गम तु खॉरी ।
बबु बॅखत्यन लोलु नज़राह त्राव ॥
बब हय आव बबु भगवान आव ॥० ॥

‘विश्वास’ बबु सुंजि पजि पछि छु देंरिथ,
नतु पॅथरिस ग्वलाब पेयि हे हॅरिथ ।
बबु सुंदी नावु सुत्य पकान सॉन्य नाव ॥
बब हय आव बबु भगवान आव ॥० ॥

थोवुम गुप बब हृदयस मंज़

बबु सुंदि स्यदु पीठु विश्वास प्रोवुम,
थोवुम गुप बब हृदयस मंज़ ।
सुय भगवान पानय प्रज़नोवुम ॥
थोवुम गुप बब हृदयस मंज़ ॥० ॥

शिव सुंद अवतार सुय हसॉ मोनुम,
शिवु भावु पूज़ान शिव शंकर ।
तॅम्य सुंदी अनुग्रह सत स्वभावप प्रोवुम ॥
थोवुम गुप बब हृदयस मंज़ ॥० ॥

दीनन छु रछान सीनु वोथ थॉविथ,
 छु नज़र थॉविथ पानु बॅखत्यन ।
 पायि बौड मायि सान ग्वर मै गॅज़रोवुम ॥
 थोवुम गुपु बब हृदयस मंज़ ॥० ॥

रूज्य ज्यव ह्यसु छुवु बब येमी य्वगुक,
 गॉरयून दृष्टांत छु यिवान सुय ।
 येलि येलि गोरुम तेलि तेलि प्रोवुम ॥
 थोवुम गुपु बब हृदयस मंज़ ॥० ॥

चरसा फूंकान, चिलमा वुहुवान,
 च्यतके ह्यसु बस ॐ ॐ ज़पान ।
 लोलस लोलाह सुय बरुनोवुम ॥
 थोवुम गुपु बब हृदयस मंज़ ॥० ॥

मस्तानु मॅतिस दस्ताराह गॉन्डिथ,
 सिरियि ह्युव तॅम्य सुंदुय रोय नूरान ।
 कवितायि लीख्य लीख्य पानु बोज़ुनोवुम ॥
 थोवुम गुपु बब हृदयस मंज़ ॥० ॥

बबु सुंदान आश्रमन छि लगान मेलय,
 ग्वणु गान बबु सुंद चलान यसलय ।
 'विश्वासु' बबुसुय पान पुशिरोवुम ॥
 थोवुम गुपु बब हृदयस मंज़ ॥० ॥

साकुयन चोवनस मॉरयफतु मय

ॐ ललनोवुम मंजुलिस थोवुम,
 साकुयन चोवनस मॉरयफतु मय ।
 सरकुयसरदार कुनुय ॐ थोवुमस ॥
 साकुयन चोवनस मॉरयफतु मय ॥० ॥

थनु प्यनुसुय सुत्य छयनु येलि कोरनस,
 वेंद्य वेंद्य नाद कुत्य लॉयमस मे ।
 मठि मठि दी दी नेन्दरे सोवनस ॥
 साकुयन चोवनस मॉरयफतु मय ॥० ॥

मासन हुंद शुर बाशि करुनोवनस,
 गलि गलि दामु दामु चोवनस शीर ।
 नेशबोद फ्रुस्तन सुत्य गिंदु नोवनस ॥
 साकुयन चोवनस मॉरयफतु मय ॥० ॥

ल्वकुचारस क्याह क्याह हैछिनोवनस,
 अँलिफ वाव बैयि मीम परुनोवनस ।
 च़ाटु बाजन सुत्य सुत्य ग्यवुनोवनस ॥
 साकुयन चोवनस मॉरयफतु मय ॥० ॥

अँशकुन बाज़ार सरु करुनोवनस,
 माशोकु संज़ि वेरि कैँडुनम कल ।
 कर्मचि नावि मंज़ यकबार त्रोवनस ॥
 साकुयन चोवनस मॉरयफतु मय ॥० ॥

दोह पोंशि गरु व्यवहार करुनोवनस,
 अकी गरि कोरनम मंदिन्यन शाम ।
 वालु वाशि लॉगिथ ज़ालु बंद थोवनस ॥
 साकुयन चोवनस मॉरयफतु मय ॥० ॥

दामुनस मेंहकम मे ति थफ थॉवमस,
 रज़ि खंडि अदु तॅम्य पुछुनम हाल ।
 रोशन पानु छुस तोति पृछुनोवमस ॥
 साकुयन चोवनस मॉरयफतु मय ॥० ॥

गीताजी लरि लरि चोर वीद थॉविथ,
 सारुकुय सार होवनम ओंकार ।
 तमी 'विश्वासय' ब्रोंह पकुनोवनस ॥
 साकुयन चोवनस मॉरयफतु मय ॥० ॥

सहायतस रोजुम भवॉनेय दमबदम

छम मे हॉसिल चॉन्य बॅखती छुम नु गम,
 सहायतस रोजुम भवॉनेय दमबदम ।
 शुर छुसय चोन मॉज चै हय छुय म्योन कसम ॥
 सहायतस रोजुम भवॉनेय दमबदम ॥० ॥

वास छुम हयस अन्दर चोन छुम मंदर,
 प्रंग भवॉनेय छुम गॅरिथ च़ेय क्युत स्वंदर ।
 यिख मे सनम्बख अथ अन्दर वादाह दितम ॥
 सहायतस रोजुम भवॉनेय दमबदम ॥० ॥

राज चोनुय राज लॅक्ष्मी पानु छख,
 ताजदार चुय शिव संजुय सरताज छख ।
 क्षणु क्षणु पूजान च़े छी दीव रुद्रगण ॥
 सहायतस रोजुम भवौनेय दमबदम ॥० ॥

चानि ज्योती सुत्य छु प्रज़लान सिरियि लूक,
 चॉन्य दृष्टी दूर करान अंधकार कूफ ।
 यस च़े हिश मॉज रॉछदर तस क्याह छु गम ॥
 सहायतस रोजुम भवौनेय दमबदम ॥० ॥

ही तु मसवल मायि चाने रोव करान,
 टेकु बटुनेय विरिकेमिस लोलाह बरान ।
 ब्यल तु मादल ह्यथ बु आस सोंतस छु खम ॥
 सहायतस रोजुम भवौनेय दमबदम ॥० ॥

‘विश्वास’ लेखान छुख चु लीखिथ कर्मलोन,
 पनुनि श्वब दृष्टियि मै शेरुम अज़लु लोन ।
 त्रैयलूकी च़ेय वनान करि दूर सितम ॥
 सहायतस रोजुम भवौनेय दमबदम ॥० ॥

मोदुर मय

(आज़ाद नज़्म)

छु परखुन स्वन तवय कँहवचि छु खारुन
 तवय नारस अन्दर छुय पान कारुन
 बैनिथ स्वन अदुबनख कनुवॉल्य शिवस
 तु प्रावख परमु शाँती योद चु हावस
 दज़ख नय पान कति कारख बनख स्वन
 अतु गतु गीरिसुय पयवस्तु रोज़ख
 चु कमि ज़ैवि नामु सोज़ख अज़लु यारस
 तु दपहस हावि दर्शुन
 बरख नय यछ तु पछ तस सासु सिरियिस
 प्रकाशि येम्य सुंदि छि सथ संसार प्रज़लान
 दज़ख पोंपुर चकि ती तैली करान तस गथ
 दज़ुन नारस ज़िंदय मा छुय सहल कथ
 बैनिथ शाहमार रूज़िथ अथ खज़ानस योद करख रॉछ
 तु प्रावख परमु गथ चुय
 नतु अंधकारसुय योद लोर रोज़ख
 तु गाशिच आश मँशरावख बनख जिन
 चु तैलि कति रॉछ करुहस लोलु बागस
 तु सग दिख पोशि चमनन
 म्वलुल दुर छुय ब्वन सरतल बनख स्वन
 गछख देवानु स्वर्गक्य जामु पुरिथ

तुलख अदु वुफ तु वातख तस निशी चुय
 तु प्रज़लख सासु सिरययस लीन रूज़िथ
 बनख अदु आबु कतरय बौड समंदर
 स्वभावु शीतल सनि सोन वांति रोस्तुय
 चे करनस याद अदु अर्शस तु फ़शस विश्वास
 तु बरनय वक्तु वक्तय लोल पादन
 दिनय मीठय वचुननुय चान्यन तु ग्यवुहस
 चु प्रावख लोलु सँदराह येति मोदुर मय ॥

महरेनि कोरि वॉरयुव नेरुनु वक्तु ऑही

म्यॉन्य कूरी नेरि वॉरयुव, शेरि व्वन्य गरुबार चुय ।
 युथनय हारख ओश चु वुन्यक्यन, तथ चेहय छय म्यॉन्य द्रुय ॥

अज़ तामथ सीव कॅरथम, गछु चे पूर्यनय कर्मस ।
 डयकु पूर्यनय ज़ांह मु सूरयनय, शेरि व्वन्य गरुबार चुय ॥

बख्तु बॅड नेर वॉरयविस मंज़, ऑस्यनय तति पौत्रु गाश ।
 आश मालिनिच सथ चे रज़्यनय, शेरि व्वन्य गरुबार चुय ॥

हशि हेहरु सुंज़ कॅरयज़ि सीवा, तिम ज़ॉन्यज़्यख माँज मोल ।
 ज़ॉम द्रुय बेनि बाँय वेन्दिज़्यख, शेरि व्वन्य गरुबार चुय ॥

बाँच पनुन भगवान ज़ॉन्यज़्यख, मान तस दिज़ि थोद व्यकार ।
 स्वख सावय प्रॉविव सुत्य सुत्य, शेरि व्वन्य गरुबार चुय ॥

राज येछिनय व्वन्य चै करुनुय, भगवान दीनय रुत व्यचार ।
पाठ पूजा युथनय मँशरख, शेरि व्वन्य गरुबार चुय ॥

माजि दीवी हुंद न्यथ कॅरयजि ध्यान, शिवु नाव जॅप्यजि मायिसान ।
जांह नाय सोरी स्वख सम्पदा, शेरि व्वन्य गरुबार चुय ॥

जूर्य रूजिव जोरि मारान, दय रूज्यनव मेहर्बान ।
प्राँविव ऑश अशरथ संसारुक, शेरि व्वन्य गरुबार चुय ॥

त्रेशि व्वछि होत युस ति आसी, दर्वाजस करी सदा ।
पेश कॅरयज्यस ख्यन तय चन, शेरि व्वन्य गरुबार चुय ॥

आनमाँनी सुत्य थॅव्यजि ज्ञान, युथनु जांह करख मान मान ।
गरु तुहुंदुय रोजि शादमान, शेरि व्वन्य गरुबार चुय ॥

यिम वचन लीखित मे वॅन्यमय, जॉन्यज्यख यिम छि अमरयथ ।
चै चु कूरी न्ययव नारयव, शेरि व्वन्य गरुबार चुय ॥

छुम मुसुट दिल मे वुन्यक्यस, म्योन छुय ह्योत द्योत यवहय ।
रठ चु बर दिलुकिस खज्ञानस, शेरि व्वन्य गरुबार चुय ॥

मोल चोनुय शिवनाथ छुय,

माँज चॉन्य गवरीश्वरी ।

अर्शि वॅछ 'विश्वास' ऑही ॥

शेरि व्वन्य गरुबार चुय ॥

चै जय जयकार म्यानि शम्भू

नेन्द्रि मस छुस करुम बेदार, चै जय जयकार म्यानि शम्भू ।
चु म्योन बब माँज बाँय बंद यार, चै जय जयकार म्यानि शम्भू ।।

जटा दाँरी वनान साँरी, मुराँरी छुख कल्याणकाँरी ।
चै रोस कस मै वननस वार, चै जय जयकार म्यानि शम्भू ।।

वनन फेरान कनन छी वाँल्य, यि कँम्य वोन बोल छिय बंगॉल्य ।
आदि तय अंत छु चोन व्यवहार, चै जय जयकार म्यानि शम्भू ।।

डयकस चँन्द्रमु हँटिस वासुक, सिरि सनम्वख वुछिथ कँम्य ह्योक ।
छि चाँनी सुत्य सथ संसार, चै जय जयकार म्यानि शम्भू ।।

प्रेनि तने मँलिथ बसुम रोजन, वँलिथ मृगछाल कुनुय रोजन ।
वसान गंगा जेटि छस दार, चै जय जयकार म्यानि शम्भू ।।

मगन मँस्ती अंदर चुय छुख, जपान माला पनुन्य पानु छुख ।
उमा सीवक चै विष्णु यार, चै जय जयकार म्यानि शम्भू ।।

कँरिथ हेकि कुस ग्वण वर्णन, अजर अमर चु छुख आसन ।
वँनिथ कँम्य ह्योक शिव सुंद सार, चै जय जयकार म्यानि शम्भू ।।

कैरि अष्टांग यितन अर्पन, मन अर्पण च़ेय धन पन ।
परम शिव छुख चु न्यर आकार, च़े जय जयकार म्यानि शम्भू ।।

दीनु दयालु ज़गत आदार, त्रै कारण पानु छुख ओंकार ।
त्रिलोकी नाथ त्रिभवन सार ।
च़े जय जयकार म्यानि शम्भू ।।

म्वलु रोस दुरु फोल मनु म्वलु नावन

मोत छुम मँस्ती मंज़ वुज़नावन, थावव पनुनिस मनु मंदरस ।
द्वदु दूर्य ब्रैयि कंद रोज़स बावन, थावव पनुनिस मनु मंदरस ।।

गोड ग्वडु बु दिमस येमि अशिवाने, अमरयतु वाने नावस तन ।
गंगा जी जैटि मंज़ छु ललुनावन, थावव पनुनिस मनु मंदरस ।।

डैकि छुय च़न्द्रमु शूबान मँत्यसुय, खोबान अँमिसुंजु च़ेशमि बादम ।
जैटि छुस पारस यँच़ शूबनावन, थावव पनुनिस मनु मंदरस ।।

शक्ती सुत्य छस बँखती मँच़यॉय, सँतीयॉय नावु आय पार्वत्याँय ।
शिवस मीज गवरी वँर भगवानन, थावव पनुनिस मनु मंदरस ।।

शिव शक्ती हुंद लोल छुय बँखत्यन, क्षणु क्षणु छी करान ज़गतस रॉछ ।
हरु हरु रात्री सदा शूबनावन, थावव पनुनिस मनु मंदरस ।।

त्रिलोकी नाथ छुम दीनु दयालय, 'विश्वास' बासुम सुय भगवान ।
 म्वलु रोस दुर फोल मनु ललुनावम ।
 थावव पनुनिस मनु मंदरस ॥

मंगला नाव चोन करि मंगल

बॅखति बाव मै गॅनिराव चॉन्य छम कल ।
 मंगला नाव चोन करि मंगल ॥
 गोश थाव म्यान्यन नादन जल ।
 मंगला नाव चोन करि मंगल ॥० ॥

अष्टादश बोज़ाह शारिका जी,
 पम्पोशि पादन बोस म्यॉन्य छी ।
 हावतम सनम्वख दर्शुन मै जल ॥
 मंगला नाव चोन करि मंगल ॥० ॥

त्रेन भवनन मंज़ चोन छुय राज,
 राजि रैन्य बॅखत्यन छख रछान लाज ।
 छुस पथर प्योमुत थोद तुलुम जल ॥
 मंगला नाव चोन करि मंगल ॥० ॥

शोरि बबराह छुय च़ैय वाहन,
 तॉर क्याह त्रन भवनन चु फेरान ।
 अख शबाह सानि रोज़ सनम्वख यि जल ॥
 मंगला नाव चोन करि मंगल ॥० ॥

मौज भवौन्य मे शर कड़ युथ बु वुछथ,
 विराजमान पनुनिस मनु तख्तस प्यठ बिहिथ ।
 गँजिगाह करय प्यमय चरणन तल ॥
 मंगला नाव चोन करि मंगल ॥०॥

राक्षसन छख करान चुय सम्हार,
 बँखत्यन छख दिवान भवुसर तार ।
 दीवन चावान अमरयतु ज़ल ॥
 मंगला नाव चोन करि मंगल ॥०॥

मौज भवौन्य पौपियस मे कास संताप,
 क्षय करुम पापन दूर कर शाप ।
 फोलरावतय म्योन बैक्ती डल ॥
 मंगला नाव चोन करि मंगल ॥०॥

नेशबोद शुर छुसय ज़ारु पारस,
 बौज्यगार संसार कूत प्रारस ।
 'विश्वास' सार ॐ बन न्यर्मल ॥
 मंगला नाव चोन करि मंगल ॥०॥

सोरुय तैम्य सुंदुय

कैलाश पर्वतु प्यठ द्राव शिवनाथ,
 शक्ती सहित छुस युन सोनुय ।
 पोशि पूजा करोख पोशि वशौनुय ॥
 शक्ती सहित छुस युन सोनुय ॥०॥

डमरू वायान जैटि मंज्र गंग छस,
 हटि छुस वासक नाग शूबान ।
 डयकु कुय च्चन्द्रमु छुस लूब वोनुय ॥
 शक्ती सहित छुस युन सोनुय ॥० ॥

सूर छुस मॅलिथुय ननि तनि शूबान,
 कनुनुय छिस चंदुनक्य कनुवॉल्य ।
 रवन्डु मालु दौरी म्वखु असुवोनुय ॥
 शक्ती सहित छुस युन सोनुय ॥० ॥

मंज्रवति त्रावान छुनु ज़ांह बॅखत्यन,
 गारयस युस मनु सुय बॅखत्य टोठ ।
 स्यज़रुच नज़राह पानु थवु वोनुय ॥
 शक्ती सहित छुस युन सोनुय ॥० ॥

आकाश पाताल धरती तु शुन्य छुय,
 सोरुय तॅम्य सुंदुय शील स्वभाव ।
 माया सोस्त सुय मोह हरुवोनुय ॥
 शक्ती सहित छुस युन सोनुय ॥० ॥

छम जाय तस किच मनुकिस मंदरस,
 काया म्यॉन्य तस मनुकिस आसन ।
 धूप द्वीप आलुवस कासि असि ग़ोनुय ॥
 शक्ती सहित छुस युन सोनुय ॥० ॥

‘विश्वासु’ सान स्वरु प्रथ गरि हरु हरु,
 ज़गत ग्वर भगवान सॉक्षी छुय ।
 सुय ॐ मंत्र सुय ॐ म्योनुय ॥
 शक्ती सहित छुस युन सोनुय ॥० ॥

श्रद्धांजलि

तस शुरयन हुंजि माजि श्रद्धांजलि
 खस सिर्फ 4 अगस्त 1962 ई प्यठ 31 जनवरी 1973 ई दुहचि
 अकि बजि तामथ मे नखि डखि रूज तु पतु द्रायि स्वर्गस कुन।
 भगवान बब दीनस आत्माहस शांती।

आर रोस द्राव यार म्योन,
 त्रॉविथ मे चोल वनुवास गव।
 दिल पनुन कति रूद पनुन,
 ह्यस होश डोलम तलुवास गव।।

पेयि हॅरिथ लवहॅच बबर,
 सोंतय कंडयव तस बोसु दित्य।
 गुल रिवान रूद छायि छाये,
 मखमलस तस खासु गव।।

दिल छु ऑव्युल पोश अख,
 फवलि येलि फवलन तेलि शालुमार।
 'विश्वास' कर च्यड रठ करार,
 चोन बूजिथ त्रास गव।।

ॐ शांति शांति शांति
 (अंद)

अमरुचतु वरुनि



टी. एन. गंजू "विश्वास"